

東

華

續

錄

東華續錄

咸豐十三

臣王先謙敬編

臣陶澐宣恭校

咸豐二年壬子春正月壬子朔元旦節 上御殿受賀○諭內閣  
向來親郡王等例應在紫禁城內騎馬者年至六十五歲始准其  
乘坐椅轎惠親王係朕之叔允宜特加優異著即在紫禁城內乘  
坐二人椅轎用示朕敬長親親至意○諭綿悌之繼子奕劻著加  
恩賞給貝子兼奉慶良郡王綿懋祭祀○乙卯允舒興阿奏籌辦  
甘肅保甲○己未享 太廟○諭內閣前據慶錫奏請恭勘 陵  
寢河道酌籌疏通一摺茲派陸應穀敬謹履勘據奏稱均係應行  
疏濬之工著即派慶錫敬謹承修所需銀兩准其在於撙節歸公  
項下勤支辦理並著欽天監先將東西兩方本年宜修處所擇吉

興工其南北兩方俟明年再行諏吉興辦○辛酉所穀於上帝  
○諭軍機大臣等上年十二月十七日賽尙阿奏報軍務以後迄  
今又將一月未據續有奏報朕心甚殷盼望前奏南北二路疊次  
獲勝連營進逼朕又聞向榮奪據橫嶺俯瞰永安州城城外賊匪  
紛紛遷入城中是我兵已據勝勢正可乘機合力一鼓攻克何捷  
報尙爾遲遲耶見在永安北路已有重兵進壓南路及各路兵力  
是否不至稍單卽日攻克州城總宜將著名首匪悉數殲擒儻僅  
將州城收復仍任匪眾潰圍出走再向他處竄擾尙復成何事體  
賽尙阿膺此重任經朕節次訓誡諒無不布置周妥凡水陸各要  
隘逆匪可圖竄逸之處總宜嚴密隄防卽前此攻克之風門坳紫  
荆山等處山隘叢雜久爲該逆巢穴亦宜加意防堵毋任逸匪復  
行竄踞以致日久稽誅本日據賽尙阿鄒鳴鶴會奏鄰省撥解錢

文諸多窒礙見在勸諭商民分別灑帶領運以平錢價等語著卽照所擬妥爲辦理又鄒鳴鶴片奏各屬團練漸收成效仍著通飭妥辦永安叢爾孤城如果四面各州縣嚴杜接濟則賊匪自閏八月朔踞城後幾及半載鹽糧火藥何以不見困乏仍能抗拒自如團練以資防守而斷賊接濟尤爲要務著嚴飭近賊各屬地方及帶兵文武員弁一體實力杜絕使賊費糧內匱則大兵會合攻剿可期迅速蕲功不至虛延月日矣將此諭令知之○命裕誠爲大學士以禧恩爲戶部尚書調德興爲戶部左侍郎以奕經爲工部左侍郎由英吉沙爾領隊大臣遷○以直隸總督訥爾經額協辦大學士○壬戌諭內閣御史張煒奏請嚴禁演戲奢靡積習等語京師五城向有戲園戲莊歌舞昇平歲時宴集原爲例所不禁惟相沿日久競尚奢華如該御史所奏或添夜唱或列女座宴會飯饌日侈一日

殊非崇儉黜奢之道至所演各劇原爲勸善懲惡俾知觀感若靡曼之音鬪狠之技長奸誨盜流弊滋多於風俗人心更有關繫見在國服將除必應及早嚴禁著步軍統領衙門五城御史先期刊示曉諭屆時認真查辦如仍蹈前項弊端卽將開設園莊之人嚴拏懲辦以振靡俗而除積習○賽尙阿奏永安逆匪經向榮等將各營營一律移近日夜進攻該逆兩次來攻俱被兵勇擊敗十二月初二日該逆千餘三路出巢當卽催令兵勇五路出應兩次鏖戰傷斃二三百賊斬取長髮賊首二十餘顆嗣據查明打斃賊目係黃滿乃羅大剛之先鋒初四初九初十等日疊次進攻十一日該逆衝出三股約有二千餘眾新潮勇首先接仗官兵繼上一齊開放槍礮誘令入伏各路截擊傷斃逆匪二百餘名十三日復斃賊六七十名十六日斃賊百餘連日用二千斤大礮乘高轟擊打

入賊巢三十日三隊兵勇分路前進槍礮齊施該逆紛紛倒地是日先後斃匪三百餘人帶傷逃去者無數其南路經烏蘭泰於十二月初四日進攻水竇斃賊六七十名初七日復斃賊二十餘名初九日各路同時並進辰刻至水竇用礮轟擊斃賊五六十名十二日賊出五六千名兵勇分路迎出又有百餘賊飛撲而來烏蘭泰截住極力死戰賊勢稍退南面賊眾與湖北兵對敵甚緊金玉貴等趕來湖北兵勇氣倍加奮力撲殺賊眾大敗先後斃賊百數十名十五日該逆見我兵少傾巢而出兵勇來往酣戰二十餘次殺賊百餘名並紅風帽賊目二名該匪大敗回巢堅壁不出十八日由獨松嶺進攻水竇賊始不出後誘出五六十賊一經追擊退回匪巢許祥光張敬修於初四日出隊分三路進轟打賊營西南馮玉衡由峽中進轟打賊營西許祥光督運大礮六位安設松山

上朱啟仁等帶勇列陣誘敵該匪不出大礮連環轟擊斃賊甚多  
初九日擒獲匪黨據供初四日被礮擊斃賊目秦軍帥十七日以  
四百人伏於松山以二百人過河誘敵以四百人伏於峽內以八  
百人護運大礮先在松山轟擊令各勇埋伏接應以一二百人誘  
其出追各營賊眾絡繹而出其二三千之多誘賊之勇佯退過河  
數十匪直入谷口伏勇齊起用連環槍斃賊二十餘名餘匪退出  
伏勇直追出谷口分兩隊迎擊斃賊數名賊卽奔竄復麾各勇下  
山分投截擊計是日鏖戰四次斃賊六七十名二十三日向榮出  
隊悉銳專攻東礮臺舊縣各路兵勇一齊追趕攻打多時賊眾死  
拒仍不能入當卽傳令撤回計此戰擊斃賊匪約三四十名擊傷  
賊匪甚眾烏蘭泰於二十三日攻打賊寨約一時之久賊出六七  
十名被兵勇打回不敢復出許祥光張敬修於二十三日由能六

嶺紅泥嶺而進疊有斬擒臣以永安逆匪漸見困蹙而土壘礮臺總未攻入卽於二十六日自荔浦赴永安以北距城三里安營賊之礮臺營牆厯厯可數擬二十七日進兵大舉而陰雨連宵淋漓不止與向榮及各鎮將密商機宜俟天氣晴霽卽當合力併攻上諭見在賽尙阿已統率文武員弁馳赴永安以北距城三里地方安設大營親自督戰計此葺爾孤城不難卽日攻克著卽嚴飭各路帶兵大員激勵將士奮力併攻並將水竇莫村賊寨迅速掃蕩殲除勿畱餘孽所有節次打仗尤爲出力之員弁兵勇著嚴實保奏傷亡弁兵人等查明照例請卹○諭軍機大臣等戶部尙書孫瑞珍奏淮南鹽務急須嚴杜川私請於湖北東湖縣屬之平善壩南津關西壩宜都縣之白洋河紅花套設卡緝私責成宜昌鎮總兵分撥弁兵實力巡查以專責成此外另有走私之處卡座或



移或添隨地隨時相機辦理並請明定章程如於定額之外再有  
溢銷則以官鹽溢銷之多寡爲該總兵功效之大小各等語淮南  
鹽引銷路全仗兩湖近來粵私潞私浸灌尙少惟四川與湖北毗  
連由長江順流而下駛入楚境大爲淮南之害該尙書所奏均係  
實在情形著程喬采按照摺內所陳各情節逐一講求悉心體察  
應如何添設卡座分撥弁兵妥議章程明定賞罰卽責成宜昌鎮  
總兵認真稽查總期私鹽無透越之虞官鹽有暢銷之勢庶於國  
課民食兩有裨益原摺著鈔給閱看將此諭令知之○諭前因有  
人奏廣東新安縣屬沙井之孔進鄉土匪陳翹萃等招集匪徒結  
盟拜會製造船隻礮械擄殺人命各情當降旨交徐廣縉等查辦  
茲又據奏該匪陳翹萃陳顯猷陳亞索等更招得蠻家苗鄉潘耀  
夫潘華頭等數千餘人加造長龍瀨跳船隻添製礮械在沿海鄉

村劫掠上年九月該匪圍劫白岡竈下兩鄉殺斃八十七命焚溺屍身又擄去九人囚禁搶掠財物焚燒祠宇屍親赴省喊告經委連平州知州張應庚到縣拏犯該匪竟敢加築礮臺排列船械爲拒捕計該委員到縣一月並未赴鄉緝拏反欲勸令各屍親將案和息又該省南海縣人梁敏功在省城開設安盛海味行與孔進鄉匪徒勾結所有該匪製造戰船礮械一切銀兩俱係梁敏功豫爲供給各等語匪徒聚黨肆劫大千法紀全在地方官實力查拏隨時懲辦若如所奏委員畏葸養癰意存消弭必致釀成後患近來兩粵盜賊肆行重煩兵力皆地方官因循廢弛所致著徐廣縉葉名琛遴委文武員弁實力勦捕勒限嚴拏務將各案要犯全行弋獲盡法懲治毋任一名漏網並確查前派委員張應庚如有私和命案受賄不辦情事卽行據實參奏毋稍瞻徇原摺著鈔給閱

着將此諭令知之○賽尙阿等奏大兵雲集永安克復州城期在指顧捷報後需費繁多請籌撥餉銀二百萬兩俾得迅速蕝事下部議從之○甲子兩江總督陸建瀛等奏籌辦海運事宜並酌議章程十條一海運事繁任重必期經理得人一交倉漕米必須籌補足額一籌銀款以備撥用一籌補緩缺南糧毋庸援案截撥一停運旗丁水手分別調劑資遣一沙船領運漕糧悉遵成案一巡哨防護倍宜周密一籌備天津通倉經費照案支用一剝船經紀食耗等米備帶本色一天津交米之後循舊責成經紀下部議行○乙丑諭軍機大臣等楊文定奏江蘇錢漕積困日深見籌整頓情形一摺江蘇漕務疲玩與大戶把持之弊朕早有所聞必當力求整頓庶可漸挽頽風茲據該撫縷陳積困情形並酌籌辦法數條分晰具奏朕詳加披閱如調查州縣實徵紅簿嚴覈牧令交代

限期減漕尾以速催徵慎更調以杜虧欠所議均屬周妥其大戶之包攬小戶之詭寄刁生劣監之把持公事圖喫漕規以及州縣幫弁之藉詞勒索書吏門丁之藉勢中飽種種弊端皆應實力訪查隨時懲辦該省蘇松等屬漕糧見在改由海運著該撫於漕務辦竣時飭屬各就地方情形認真清釐總期苛徵可息民困可蘇如有紳衿大戶把持抗欠等弊卽行據實具奏從重治罪以儆刁風至所稱興修水利墾築荒廢淹浸田畝均係地方要務該撫惟當實力整頓毋託空言以副委任將此諭令知之○戊辰允季芝昌等奏辦福建保甲章程○己巳安徽巡撫蔣文慶奏山東省拏獲匪犯審有結捻結幅情事如係強劫或訛搶得贓以人數之多寡定罪名之輕重見已立有專條安徽與東省連界從前結捻之風尙不多見近則踵事效尤閭閻不堪其擾此次嚴飭文武委員

會同各地方官疊獲擒首程六麻孜等多名因另有曳刀手名目已將首要各犯從重擬以斬梟立決卽從犯亦不輕貸足示懲創此外僅止結捻搶並無曳刀名目者仍未能盡絕遇有此等匪犯一經拏獲自可做照山東省專條分別擬以斬絞發遣以昭炯戒然與其比例定擬莫若將捻匪一項改爲山東安徽通例由地方官先行出示曉諭俾頑民知例禁森嚴庶可斂迹教而不悛悉照新例施行俟數年後此風稍息奏明仍照舊例辦理於挽回風氣不無裨益 上從之○庚午諭軍機大臣等據孫鏞鳴奏廣西難平之患尙不在永安一處其召募之廣勇及各處壯勇均不受節制戰不向前處不安靜並有暗中通賊者聞與裁汰遂肆劫掠新到潮勇尤節節滋事經過梧州地方閉城數日其招安之巨匪如大頭羊大鯉魚等仍在潯梧一帶江面包貨抽稅剽劫如常等

語向來召募鄉勇最難遣散見因兵力不敷不能不兼資練勇將來事平之後或抽擇精壯充伍其出力得功者畱營拔用其餘遣歸復業或酌畱若干人派員管帶梭捕土匪防守地方一二年再行全撤必應先事妥爲籌計務期萬全無弊不至貽患將來卽見在各路募勇亦應嚴飭管帶之員堅明約束若如所奏戰不向前處不安靜甚至陽奉陰違與賊暗通消息萬一輕信誤用貽害無窮至大頭羊卽張釗大鯉魚卽田芳等投誠以來是否眞能效力見在如何驅使若仍在沿江劫掠抽稅地方官隱忍姑容必致又釀巨患以上情節均著賽尙阿嚴密訪查據實懲辦切勿受人蒙混原片著鈔給閱看再大兵雲集永安剋日收復前經降旨北路軍威雖壯南路及各路要隘必須一律堵截其紫荊山等處逆匪舊巢尤應防其復踞著再申諭帶兵各員嚴密攻剿斷不可再任

竄逸儻不能遏其出路查明賊自何路竄出朕惟有將該處帶兵  
大員重治其罪決不寬貸將此由四百里諭知賽尙阿並諭令鄒  
鳴鶴知之○辛未吏部以大學士裕誠應定何殿閣請得旨著爲  
文淵閣大學士○甲戌諭內閣三載考績激揚大典朕受 皇考  
付託之重惟知克敬克勤仰報 深恩與內外臣工共圖上理滿  
漢諸臣有人品端方辦事實心者固應量予甄敘或年力就衰因  
循不振者亦斷難姑容茲屆京察之期吏部將京外各大員開單  
題請朕詳加酌定大學士賽尙阿祁寯藻禮部尙書何汝霖在軍  
機處行走有年實力匡襄殫心竭慮自軍興以來夙夜在公勤勞  
倍著賽尙阿總統軍務調度有方工部侍郎彭蘊章自參樞務以  
來克盡厥職協辦大學士杜受田學醇品正在上書房行走多年  
深資訓誨見承辦 實錄底本詳慎纂輯不遺餘力戶部尙書孫

瑞珍辦理部務事事實心盡力籌維任勞任怨協辦大學士直隸  
總督訥爾經額久任畿疆於吏治營伍亦能整頓辦事諳練湖廣  
總督程裔采除暴安良克膺疆寄兩廣總督徐廣縉慎密有爲操  
縱合宜雖所轄兩省地方不靖而平日辦理一切朕甚嘉許均著  
加恩交部議敘吏部左侍郎侯桐年力衰邁右侍郎明訓辦事頗  
預難期振作精神太覺頹敗俱著原品休致餘著照舊供職○轉  
張芾爲吏部左侍郎以邵燦爲吏部右侍郎由內閣學士遷○調全慶爲  
吏部右侍郎轉書元爲刑部左侍郎調奕經爲刑部右侍郎以錫  
齡爲工部右侍郎由內閣學士遷○乙亥命吏部右侍郎全慶正紅旗漢  
軍副都統隆慶往朝鮮冊封王妃○丙子刑部奏審明倉場私造  
小斛田泳德等定擬罪名得旨田泳德著發往新疆遇赦不赦郁  
五發極邊煙瘴充軍遇赦不赦凡倉場花戶雜役人等有犯案充



發者均不准遇赦釋回嗣後刑部辦理此等案件務須加倍治罪若稍涉寬厚恐爾部堂司各官不能當此重咎也○丁丑諭內閣季芝昌等奏臺灣匪徒聚眾謀逆業經擒獲首夥各犯一摺此次匪首洪紀等在臺灣嘉義交界之附近內山地方歃血結盟豎旗肆搶糾約林漏等多人僞稱元帥先鋒分爲四大股首各用紅布爲記展轉裹脅先後在官佃等莊及溪底各處屯聚經臺灣鎮道葉紹春徐宗幹等督飭文武員弁併力攻剿疊次殲斃賊匪多名生擒僞副元帥李兆基僞先鋒林單顏耀並將首逆洪紀要犯林漏僞軍師胡技拇僞副元帥吳仰一併拏獲正法該逆等甫經蠢動事起倉卒該管文武各官卽能先行訪聞率兵分剿未及一旬已將首要各犯悉數就擒夥黨亦獲犯過半辦理尙爲妥速惟該犯等糾邀黨與究有若干潰散餘匪未經全獲難保不潛相勾結

更起事端著季芝昌王懿德嚴飭該鎮道等督率所屬徧行按捕

務期有犯必懲毋任一名漏網續辦情形及在事出力獲犯最多

各員著該鎮道等查明據實具奏○戊寅添設安徽無為州江壩

隄工○陳之驥以病免以岳興阿為湖南按察使由江蘇鹽○辛

巳諭內閣廣西軍需經戶部陸續撥解並由內庫發給帑銀諒可

源源接濟惟念此時兵勇雲集需用浩繁賽尙阿已移營永安城

外督兵進剿逼近賊巢不難指日蕩平揜渠埽穴正當圍攻緊要

之際所需軍餉尤不可稍有延緩致誤事機著戶部再行迅速籌

畫寬為儲備以濟要需其前次指撥各款如查有尙未起解者亦

著戶部迅卽飛咨各省催令速解廣西毋得遲誤○諭賽尙阿奏

進攻賊巢連獲勝仗一摺永安逆匪於上年十二月二十七三十

等日疊次出巢窺伺均經兵勇擊退本年正月初一日向榮親督

鎮將攻賊之西礮臺兵勇奮勇爭先並將東礮臺之賊擊傷多名  
初二日向榮仍至西礮臺用大礮對嶺轟擊東礮臺之賊分股來  
撲參將馬龍督兵追擊立將賊匪擊敗次日向榮督率鎮將先攻  
東礮臺紅廟等處誘賊出巢兵勇短兵衝殺該匪竄回乘勢追入  
立奪小礮臺一處烏蘭泰與開隆阿督帶兵壯攻西礮臺之南並  
攻開賊寨兵勇擁入該匪被擡槍火彈擊斃甚多許祥光張敬修  
於初二日擊退賊匪遂於松山立營築礮臺於能六嶺頂又於獨  
守廟及古眉峽口等處立三大營十二日紅廟等處之賊冒雨撲  
我新營亦經兵勇擊退並據奏稱賊之礮臺望樓爲風雷擊毀兩  
處該逆等罪大惡極神人共憤見在勢益窮蹙定可卽日蕩平該  
大臣等當激勵將士乘勝圍剿務使悉數殲除勿畱餘孽○諭軍  
機大臣等賽尙阿奏連次攻剿情形並密陳一摺逆匪竄踞永安

州城數月以來負隅抗拒該大臣移營永安城外督兵進攻晝夜  
籌維不避艱險披閱之餘朕心甚爲懸繫該匪詭譎異常見在大  
營去賊巢甚近布置號令安保其不潛窺密探務宜加倍慎重不  
可稍有疏虞向榮疊次攻賊均能身先士卒不負委任見旣督率  
各路鎮將卽著與該大臣面商機宜隨時贊助其提督印務仍著  
劉長清署理此時南北兩路責成烏蘭泰向榮督辦合力堵剿克  
城之日孰爲首功朕必立加重賞若賊首潰圍出走查明由何路  
竄出朕亦必嚴治其罪見在逆匪北路之東西礮臺南路之莫村  
水竇皆與州城相爲犄角該大臣趕製攻具係由何處攻入是否  
先攻城外之礮臺及莫村水竇等處去其羽翼抑或直抵城下攻  
其巢穴務當相機進剿出奇制勝諒賽尙阿必能籌畫萬全胸有  
成算也至嚴斷接濟尤爲第一要著該匪困守一隅所需鹽糧火

藥等項如果無人接濟何能日久支持見既屢有拏獲仍當嚴行  
斷絕使賊匪進退失據勢孤力竭自不難一鼓成擒卿密摺內所  
陳各情具見忠悃致朕不能言喻亦不忍覽卿雖艱苦備嘗形瘦  
心疲斷不可過費精神有誤大事朕亦無言再諭矣至向榮頓改  
前非奮勇出眾朕心甚喜卿可傳旨嘉獎使伊倍知感奮烏蘭泰  
人尙持重南路喫緊責在一人斷不准再有疏虞賽尙阿身膺重  
任忠誠朕所素知亦斷不疑其坐擁遷延虛糜帑項軍餉一節甚  
關緊要見已飭戶部再爲寬籌儲備矣該大臣其善體朕意努力  
歲功以慰廑念將此由六百里諭知賽尙阿並諭烏蘭泰向榮知  
之○予廣西死事參將李廷楷祭葬世職○是月給直隸任邱等  
三縣安徽宿州等七州縣及屯坐各衛湖南安鄉縣被水災民口  
糧貸江西德化縣湖北漢川等三縣及屯坐衛所軍民籽種緩徵

直隸薊州等二十九州縣水災雹災展緩浙江海甯等十七州縣  
歉收新舊額賦免江蘇淮安等七府州攤徵未完挑築河工銀  
二月壬午朔諭內閣我朝景運延長 列聖相承均於登極之初  
選建萬年吉地朕紹登大寶恪遵 成憲於上年特派載銓彭蘊  
章基溥前往 東陵相度並諭令陸應穀來京協同選擇茲據該  
王大臣等先後奏稱見於 東西兩陵擇有吉壤數處仍宜詳加  
勘度以昭慎重著派定郡王載銓大學士裕誠禮部尙書奕湘總  
管內務府大臣署刑部侍郎基溥工部侍郎彭蘊章會同江西巡  
撫署刑部侍郎陸應穀各帶諳習堪輿之人敬謹覆看繪圖呈覽  
以定福基用副朕纘承 先緒垂裕後昆至意○甲申以 宣宗  
成皇帝梓宮奉安 山陵恭奉 神牌回京免經過地方本年額  
賦○乙酉諭內閣德興奕興奏查辦蒙古王旗地酌議章程開單

呈覽據稱奉天捕盜弁兵責成該管廳員認真考覈該管府尹衙門按年覈其獲犯多寡以定功過去畱其滋事首犯王柏齡易發增吳保泰等所種地畝撤歸該王旗另行招佃不准扣還押荒銀兩其餘從犯暫免撤地以觀後效等語均著照所議辦理其歷任辦理不善之廳員著奉天府府尹查明據實分別參奏仍嚴定考覈章程奏明遵辦以除積習而收實效○丁亥陳慶偕以病免調李德爲山東巡撫未到任前以布政使劉源灝暫署以柏貴爲河南巡撫崇綸爲廣東布政使張印塘爲雲南按察使由安徽池州太廣道遷

○戊子祭

大社

大稷

○癸巳諭

軍機大臣等

有人奏

安徽鳳

陽潁毫等屬

民情强悍常掖刀遊蕩名爲曳刀手壽州漢回尤多不睦私造刀槍擡槍每因口角細故各糾集匪徒數百人約期互毆以致匪徒乘機搶掠等語漢回尋釁互鬪最爲閭閻之害該地

方官若不隨時懲戒必致釀成巨患雲南永昌之案可爲前鑒著陸建瀛蔣文慶嚴飭各屬於所轄地方力行保甲剴切曉諭並嚴禁私造兵器以期弭患未萌儻頑梗不化報復相尋立即查拏按律懲辦毋稍姑息原摺著鈔給閱看將此各諭令知之○甲午諭軍機大臣等廣東凌十八股匪自困守羅境墟以後經該督徐廣縉督兵圍剿將全隊奔逃之吳三等匪斬擒殆盡該督於十二月初十日進駐信宜縣城就近督兵攻圍並嚴斷接濟自不難剋日殲除惟自正月十八日接該督奏報後又將一月未得續報朕心甚爲焦盼此股匪首凌十八係著名會匪與洪秀泉等同惡相濟見在賽尙阿親抵永安城外督兵環攻逆匪勢日窮蹙若凌十八一股刻即剿除該督乘勝前赴永安合力圍攻更易得手且可堵截逆匪逃竄之路著徐廣縉嚴飭帶兵員弁將凌十八股匪迅速



殲滅毋任窮寇苟延一有捷音該督卽行馳奏並督帶官弁兵勇

與賽尙阿會合迅奏膚功以慰廑念將此由四百里諭令知之○

丙申以勝保朱蘭並爲內閣學士勝保由光祿寺卿朱蘭由少詹事遷○奕毓以病

免調錫齡爲工部右侍郎以哈芬爲工部左侍郎由鑲紅旗滿洲副都統遷○

戊戌兩江總督陸建瀛奏前督臣陶澍於淮北極疲之時議改票

鹽一切規模數年而後定見聞淮南議論紛紛意欲更改章程業

經出示查禁俾人心不至搖惑得旨慎勿爲浮言所惑著傳諭劉

良駒斷斷不准將就若稍有搖惑則前功盡棄矣○已亥賽尙阿

奏顏品瑤餘黨在靈山縣新鋪那勤分踞十一月十八二十等日

張國樑壯勇進剿把總張鴻才直逼賊巢柵內被礮子打入右膝

至十二月十八日礮子尙未取出奮不顧身裹創進戰殺賊多名

又被礮子打入右骹肚越日仍裹創復戰其勇往實屬僅見然終

不能破柵勞崇光接據左江鎮惠慶函商以分攻兩巢既不能同時勦洗莫若合攻一處冀可併力破除當卽覆函照辦惠慶等隨於附近山貝墟各練丁內挑選千名並派生員滕錦常溷入那勤賊巢乘機反間該匪彼此猜疑被脅之人逐日散出惠慶以時屆歲除兼值陰雨該匪防禦必疏二十九日帶同李天鈺督飭兵勇自山貝冒雨馳行千總陳振威等由榨油村越嶺直抵那勤柵後伏於半山從九品周紹基等攻其後柵從九品姚章等伏於賊巢左右參將德亮等攻打前柵遊擊雙貴等隨後接應候補府經歷羅遠揚等周歷巡防俱於板暮村佛子坳兩處會齊惠慶卽督同並進直逼賊巢圍攻該匪驚慌無措開柵出拒陳振威等卽領練丁一擁到柵點然火罐火箭孫方增等亦帶練勇將山草油松堆積焚燒時值北風正緊立將柵木燒斷延及該匪收藏火藥之屋

賊眾見柵中火起不敢竄回傷斃甚眾餘匪東西奔竄新鋪賊前來救應經東省遊擊蘇崇阿等督兵勇迎截該匪堅守不敢出援查那勤柵內燒斃二百六十一賊西省兵勇割驗首級一百五十三顆生擒十一名奪獲大礮六具旗幟槍牌數百件將巢內房柵盡行燒燬賊首蘇凝三尙無下落逃竄之匪經各處獲解送營共百八十餘名見飭各路嚴密截捕一面飛催德亮等立即前進惠慶移營會勦藍翎把總張鴻才請旨以千總補用俾昭激勸此外出力文武官紳員弁兵勇查明覈實保奏 上諭內閣粵匪顏品瑤餘黨在靈山縣新鋪那勤地方分踞日久甚屬狡悍勞崇光惠慶及參將德亮等設計用間於除夜冒雨焚毀賊巢殲擒殆盡謀勇兼施實堪嘉尙著卽督飭在事文武會合兩省兵勇乘銳前進將新鋪賊巢一律蕩平著將帶傷逃竄之首匪蘇凝三嚴拏務獲

毋任遠颺把總張鴻才疊次裹創力戰奮不顧身勇敢異常著卽以千總升用此外出力官紳員弁兵勇查明據實保奏候朕施恩○賽尙阿奏前發摺後仍大雨正月二十七日少止二十八日飭各營擯運大礮對城轟擊每擊一礮屋瓦皆飛二十九日西門城樓擊塌一角三十日向榮先以勇壯誘敵該逆果出千餘誘敵之勇詐退賊眾來勢頗兇當被舊潮勇與提標之勇分兩翼撲去川北官兵繼上該逆大敗而去共計殺賊五六十名其西面兵勇見莫村及西礮臺各出賊四五百人分三隊而來剛至半坡卽被荔浦博白等壯勇齊施火罐立將該逆擊走其餘復從嶺後包來當經雲南兵槍礮齊施燒傷擊斃不下百餘該逆潰竄二月初一日天色微雨仍將大礮向城轟擊初二日濃雲密布城內暨莫家村兩處出有千餘人將往水竄見我兵已到西礮臺對嶺開礮賊卽

乘奪此嶺雲南官兵帶領壯勇首先接仗安徽四川官兵接應湖南廣西官兵帶領潮勇從旁衝出截賊隊爲數段該逆退至河邊槍礮連環疊擊賊隊傷斃無數紛紛踏水過河闕散兵勇趕近賊巢轟擊忽大雨驟至當卽調回據烏蘭泰稟稱二十七日會同許祥光張敬修攻擊羅瓊賊營安礮松嶺打中三百餘礮賊勢驚惶隨令奮兵壯勇續放火具連日分三路轟擊忽見賊營黃旗搖動約出七八百賊各勇迎戰擊倒多名初二日賊出三四百名向松山撲來兵勇接戰斃賊二十餘人臣在營門礮臺望之思歷在目滿擬天氣晴霽冀可一鼓而前而此間春雨最多淋漓不止焦灼萬分二十八日弁兵檢回逆書一本居然妄改正朔實屬罪大惡極臣惟激勵將帥痛加剋洗誓必剋期剪滅以靖妖氛 上諭賽尙阿奏連次轟擊賊巢進兵獲勝情形一摺據稱南北各路圍攻

永安逆匪節次進逼該匪堅拒不出正月二十八日以後官兵連用大礮四面轟擊城內外賊屋擊塌無數並遣勇壯誘賊出巢節次殺斃多名其往來羅甕水寶之賊均被兵勇堵截鈔殺見在仍用礮連環轟打並斷其爨汲路徑等語逆匪抗拒日久兇狡異常自該大臣親抵永安城外督飭大兵占據山嶺合力環攻匪勢日就窮蹙著卽趕造攻具督率將士迅掃妖氛勿任竄逸滋蔓○諭賽尙阿奏遵查降補都司不知愧奮請旨革職等語趙如勝前於擢升四川北鎮總兵後因徐廣縉等奏請畱粵防剿託故遷延降旨以都司降補發往廣西軍營差委該員苟有天良應如何感激圖報以贖前愆乃自派往南太之後仍復不知愧奮於賊竄靈山時經惠慶等派帶兵勇赴崎嶇會剿輒以兵單爲詞多方藉口實屬畏葸無能有心巧飾僅予革職不足蔽辜趙如勝著革職發

往軍臺效力贖罪以示懲儆○諭軍機大臣等本日據寶尚阿奏擊賊獲勝並連日陰雨情形一摺此股賊匪負嵎日久雖官軍屢次戰勝而其兇狡之狀百出不窮悖逆多端實堪髮指細察各路剿辦情形自正月二十四日至二月初二日將士辛勤人人用命該大臣盡心竭力備極憂勞朕懷時深廩念該匪醜類眾多屢經官兵剿戮勢已窮蹙且困守孤城果能斷其米鹽火藥接濟及攀汲路徑釜底游魂豈能持久見在南北兩路圍攻逼近城垣務須嚴飭在事文武勦力同心滅此朝食其著名首逆尤當悉數殲擒萬勿稍有疏虞致令免脫所望晴霽連旬上蒼默佑攻戰得力迅奏蕩平該大臣諒亦知朕寢饋之不安矣徐廣縉見駐信宜前已諭令該督將凌十八股匪迅速殲除後卽督帶官弁兵勇乘勝馳赴永安與該大臣合力圍攻庶兵力更厚且可截擊逆匪逃竄

之路所有應用軍餉前飭戶部寬爲儲備并著咨催各省將未經起解之款速行解粵不知廣東勸捐兵餉成數若干著卽飛咨徐廣縉葉名琛有可撥解應急之款先行儘數解赴粵西軍營較部解及各省批解更爲捷近另單所奏思恩泗城鬱林新甯天保遷江貴縣各府州縣屬奇零餘匪或漏網殘生或倉卒嘯聚各該地方員弁隨時剿滅尙多脫逃之犯閭閻未能安靜仍著督飭藩司勞崇光率屬妥辦見在靈山縣那勤地方賊巢業經焚毀斬擒殆盡若再將新鋪地方股匪殲除則南太一帶不難次第肅清專盼永安捷音早晚入告也所有出力之文武各員弁兵勇著該大臣詳查據實保奏其陣亡兵勇著分別咨部議卹將此由六百里諭令知之○庚子諭內閣徐廣縉葉名琛奏圍剿羅境逆匪連獲勝仗情形一招逆匪凌十八一股自竄踞羅境墟以來負隅拒守該



督徐廣縉於上年十二月進駐信宜督飭挑壕築牆以防逃竄該匪疊次衝突俱被我兵奮勇鈔截擒斬多名無一走脫見在賊勢坐困訊據獲犯供稱自挑壕築圍以後接濟全斷墟中鹽糧將盡計可一鼓剿除著卽嚴飭在事文武督率兵勇迅速進攻務將此股逆匪聚而殲旃毋任餘黨竄逸另摺奏廉州會剿匪徒攻破那勤賊巢等語昨已據賽尙阿奏到此次兩省官兵用計設伏將那勤賊匪殲擒殆盡均堪嘉尙著徐廣縉仍飭兩省帶兵文武乘勝會合將新鋪賊巢一併掃蕩勿畱餘孽○諭軍機大臣等本日據徐廣縉等奏請撥粵海關稅以濟廣東軍餉一摺據稱接奉部行接濟團練章程業經出示曉諭一俟捐有成數卽行儘解廣西惟自上年十月停止捐輸以後一切經費計無所出是該省自行動用之款已形支絀而接濟西省之項亦關緊要著該督等再行籌

畫如見在停止捐輸於軍餉急需實有窒礙卽著查照該督等原

議捐輸章程一面迅速奏聞一面妥爲辦理總期有裨實用無誤

事機於兩省軍需得以源源接濟諒該督等亦深知近來撥解惟

艱必能通盤籌畫辦理妥善也將此由四百里諭令知之○辛丑

上奉 皇貴太妃啟鑾謁 西陵○甲辰賞校尉等銀並沿途

行宮弁兵半月錢糧○乙巳 上謁 泰陵 泰東陵 昌陵詣

昌陵饗殿 孝和睿皇后梓宮前行饗奠禮詣 慕陵 隆恩

殿 宣宗成皇帝梓宮前行饗奠禮詣 孝穆成皇后 孝愼成

皇后 孝全成皇后寶城前行禮畢閱視 寶城○諭內閣王慶

雲聯英奏遵旨查明山西清查情形並參員追款一摺山西清查

章程既經兩次釐定由部議准一切應追應解各款著卽由該撫

分別報部查覈其彌補舊虧有酌提優缺羨餘一節恐啟那新掩

舊之弊嗣後州縣交代該撫務當嚴飭該司截清款項禁止通融  
斷不准以前任無著之款累及後任儻該管上司抑勒接受及虛  
出通關希圖掩飾卽著一併參處○丙午 上詣 慕陵 隆恩  
殿 宣宗成皇帝梓宮前行朝奠禮至庚戌皆如之○詣 昌西  
陵閱視工程並閱視 慕陵後山○賞已革刑部左侍郎寶清三  
等侍衛爲駐藏幫辦大臣○己酉賽尙阿奏向榮於本月初七日  
派令兵勇出擊方偏賊壘大雨卽至該逆突出千餘分四五路來  
包都司余開春等斃賊多名守備王家冀帶領潮勇趕到開放連  
環烏槍賊眾紛紛倒地我軍直到西礮臺外壕初八日大雨傾盆  
賊亦不出營中平地水深尺許初十日雨止總兵和春等從馬背  
嶺取路前往古束察看以通聲氣長瑞長壽邵鶴齡帶兵三千隨  
後接應詎賊已出有千餘向東行走和春兵勇分隊截擊賊卽回

撲因馬背嶺前後水田兵勇行走不能疾便賊先將小山三座站住我兵從田間仰攻賊之槍礮密如雨點潮勇提勇奮力抵敵和春指揮守備朱占鼇等齊進將三座小山搶占各兵勇乘勝追殺擊斃八九十人城賊出四五百人舊縣出七八百人截我歸路我軍後隊迎擊打斃多名賊遂退伏牆內兵勇直至馬背嶺前轉截賊後摩天嶺有賊二三百人黃旗亂動意在出巢向繼雄於對面小嶺上放礮轟斃數賊和春等復從水田衝去賊知不敵一關退回是日斃賊百餘十二日各路兵勇分攻東西礮臺臣與向榮酌商一面用大礮轟擊摩天嶺東礮臺牽制賊眾一面提兵統至大誥嶺背出其不意突襲其後不意積雨之後水勢隔絕將大小礮位一齊開放打入賊巢羣賊蒼黃入舊縣而去仍令兵勇開礮轟擊該逆始終不出此北路連日進攻情形也烏蘭泰於正月三十

日將赴羅寶之賊截回後水竄復出千餘賊分三股來撲經文岱在山頭連放大礮中賊數十副將德安侍衛開隆阿等帶兵勇迎擊東西兩股中股賊直奔博勇勢甚兇猛我軍短刃相接斃賊多名東西兩股亦被擊敗初二日賊約千人由東嶺越羅寶經文岱撥兵二百餘名留金玉貴在河東岸伏住適賊北三營鳴角東嶺賊俱轉回金玉貴等迎擊見有伏賊百餘突出金玉貴卽詐敗退回大隊過河躡伏田坎賊追至田坎三四十步我兵伏起斃賊數十人賊眾奔潰金玉貴追賊被傷連日復行進攻均未得手十三日令兵往攻水竄賊仍不出而羅寶之賊房屋被打破後伏於地溝死守查賊踞州城南有水竄莫村爲之犄角北有東西礮臺爲之援應非先奪其礮臺勢難攻城而兩礮臺俱在圍牆以內並有深壕當積雨彌月以來水深數尺難於涉越且往來泥淖之中攻

具難施稍近賊牆輒爲槍礮所傷粵西春雨本多而連旬暴雨尤爲罕見臣心竇深焦急惟有逐日出隊攻擊使賊不能竄越嚴飭各營擇要妥防一俟雨止水消卽分隊併攻以期殄滅又奏臣到粵之初各處所招壯勇已屬不少原以賊多兵寡不得不借助於勇且多募一勇卽少添一賊明知用勇之費較兵爲多而倉卒之際調兵則耽延時日募勇則取之目前當兵力難分之時如南太一股竇資壯勇之功見在所募東勇潮勇及本省各項壯勇良莠不齊奮勉出力者亦復不少潮勇打仗驍悍異常惟飢則回營覓食禁之不可稍假好言則殺賊罔顧性命其不受節制在此其可用亦在此初來至梧因船隻不齊口糧不繼又適與東勇相值兩不相能遂致然槍持械經許祥光等勸之亦遂和好無猜正月間烏蘭泰張敬修等東勇潮勇每因口角互鬪賊乃乘釁而出各勇

仍一齊奮力將賊擊退素習如此至本地招來各勇如李孟羣所帶香山勇亦在其內並未聞其滋事打仗亦尙勇敢楊瑞乾等壯勇雖由招安而來亦尙奮勇敢戰桂林等勇散之更易惟大頭羊張釗大鯉魚田芳等自就撫後未見出力因大股未平該撫勇尙無滋事案據亦未便操之太蹙如永安一旦成功須先將各勇分別遣畱然後大兵方可歸伍又奏查匪踞永安以來因糧於民剽掠附近各村糧米自無短絀至鹽斤火藥節經嚴飭各路文武督率兵壯團練於各要隘實力巡拏乃奸黨匪徒貪利亡命仍復由山僻間道暗爲轉運屢據地方官並軍營帶兵文武員弁拏獲數起立置重典其長髮逆匪由永安翻山潛出探信勾結購買接濟者亦屢經擒獲正法見在軍威整肅北路偏城甚近各隘口把守嚴密勢難透漏南則崇山峻嶺隘口甚多奸匪易於翻越且賊營

北面有東西礮臺紅廟摩天嶺舊縣等處南面有水窰莫村之隔  
尙未能近偏州城此三十里中山徑紛歧所有總要路口業經分  
撥兵勇駐紮復飭文武員弁詳查通匪路徑無論小口窄道一體  
多設巡卡懸立重賞如有匪徒接濟者立即截擊一面清查本地  
土棍儻敢勾通窩結按法重辦又奏南太股匪於二月初四日經  
各路兵壯進剿外攻裏應登時破柵首匪顏三臨陣生擒餘匪大  
潰分投剿殺殲斃無數生擒一二百人奪獲礮械不可數計兩省  
兵壯及附近團練一齊趕到將賊巢平毀甯明州及龍州一帶巨  
匪黃東汰翟二及其僞軍師陳樹禮均經吳德徵擒獲新鋪賊旣  
掃平南太一律肅清藩司勞崇光自赴南太將匪黨悉數掃平懇  
賞給頭品頂帶 上諭內閣賽尙阿奏進攻永安逆匪屢獲勝仗  
一摺並片奏南太一帶賊匪肅清等語二月初七初十十三等日



我兵南北兩路進攻賊巢斃匪甚多惟因連旬暴雨未卽大舉深入該大臣仍當激勵將士相機進剿殄此醜類毋稍疏縱至新鋪賊巢經兵勇攻破首匪顏三臨陣斬獲其甯明州及龍州一帶巨匪黃東汰翟二並僞軍師陳樹禮均各就擒南太一帶業已肅清廣西藩司勞崇光自赴南太以來與東西兩省文武會督剿賊調度有方將匪黨悉數掃除洵堪嘉尚勞崇光著賞給頭品頂帶以示獎勵所有出力之文武員弁兵勇人等著該大臣查明保奏候朕施恩該省見在有波山艇匪在梧州一帶滋擾卽著勞崇光乘勝帶兵馳赴該處督率地方文武迅速翦除勿令勾結延蔓仍嚴防永安賊匪逃竄之路與大軍聲勢聯絡定當卽日奏功也○諭軍機大臣等賽尙阿奏連日進攻並雨水過多情形又據賽尙阿鄒鳴鶴奏追捕波山賊船各一摺永安城外南北兩路經烏蘭泰

向榮連日進攻雖屢有斬擒皆因雨水過多攻具難施以致未能  
攻入朕心實深焦灼逆匪困守孤城勢已窮蹙我兵攻具見既陸  
續齊備卽當密飭帶兵大員相機攻剿破其礮臺與莫村水竇犄  
角之勢斷其鹽米火藥接濟之路並分派將弁各路埋伏接應俾  
賊首尾不能兼顧庶可一鼓殄滅據稱日日攻擾使賊不能竄逸  
固宜如此辦理惟我兵槍礮徒費鉛藥而鉛子轉爲賊所取資且  
負嵎死守牆壕外蔽賊匪內藏出入自由互相援救似此堅持坐  
耗何日是破城之時用兵之道計謀爲先總當相度地勢出奇制  
勝若旣不能設法用閒復不能嚴斷接濟一味奮勇冒險前進徒  
勞無益殊爲可惜該大臣讀朕批示當與烏蘭泰向榮熟籌破賊  
善策也至波山賊船滋擾近江各郡邑已歷數月見已諭令勞崇  
光速赴梧藤督辦該匪船至藤縣城下屢次攻撲並有欲到梧州

攻奪府城及永安逆匪約會之說不可不迅速剪除該大臣見已分飭弁兵兼程前往並飛咨東省快蟹巡船攔頭截擊卽著督飭藩司勞崇光嚴飭在事文武合力堵剿勿令句結蔓延張釗等既有反覆情形卽當不動聲色妥爲駕馭仍著勞崇光隨時察看斷不可受其欺蒙致貽後患尤不可寡斷生疑使得肆志此事辦理稍柔關繫匪輕仍應慎密爲之其那勤匪首蘇凝三是否業經殲斃抑係脫逃仍著查明具奏將此由六百里諭知賽尙阿並諭令鄒鳴鶴知之○庚戌兩江總督陸建瀛等奏豐工引河放後猝遇風暴大壩門占蟄動見仍竭力趕辦合龍得旨卿等竭盡心力安慎趕辦朕虔祈天佑以待佳音○是月展賑山東濟甯等八州縣衛被水災民一月口糧免湖廣荊州等五衛湖南澧州等六州縣積欠錢漕銀米

東華續錄

咸豐十四

臣王先謙敬編

臣陶澐宣恭校

三月辛亥朔上詣 慕陵 隆恩殿 宣宗成皇帝梓宮前行遷

奠禮○詣 昌陵 隆恩殿 孝和睿皇后梓宮前行釋服禮○

壬子大葬 宣宗成皇帝於 慕陵命大學士裕誠祁寯藻恭題

神主 上就位行虞祭禮畢恭送 神牌黃輿啟行自是每日

朝夕詣 黃幄行禮至還宮皆如之○命莊親王奕仁鎮國公有

鳳輔國公恆明協辦大學士杜受田尙書奕湘恆春左都御史朱

鳳標侍郎杜翻呂賢基散秩大臣繼善恩醇乾清門侍衛載鷺恭

奉 宣宗成皇帝神牌黃輿回京○諭內閣我朝 列聖相承

山陵禮成恭建 聖德神功碑用垂不朽我 皇考宣宗成皇帝

臨御天下三十年 深仁厚澤 轡載彌綸 時敕幾康 躬行節  
儉舉凡 制治保邦之要 悉本憂勤惕厲之心 洵足媲美 前徽昭  
茲來 許乃 聖懷謙抑 遺訓諄諄 不得建立豐碑 頌揚功德 泣讀  
茲諭 曷敢有違 伏念我 皇考功德之盛 天下臣民共聞共見  
况 實錄 聖訓炳若日星 朕卽竭慮闡揚 詎能仰贊萬一 茲當  
慕陵奉安大禮 告成 祇承 先志 不敢建立 聖德神功碑 謹  
述感 恩哀戀之忱 含淚濡毫 撰成 慕陵碑文 一篇 用誌孺慕  
並當敬謹書寫 卽鐫於 隆恩門外 碑石 以垂永久 我 皇考在  
天之靈 定邀 默鑒也 碑文曰 皇考宣宗成皇帝 御極之初 首  
戒聲色 貨利 垂訓諄諄 臨莅日久 聖衷彌篤 驕奢永戒 而心虞  
或放 勤儉時操 猶力恐未 堅迨辛卯歲 重卜龍泉吉壤 一切規模  
悉從儉約 並 聖製詩章 以垂法守 崇儉德 訓後世 可謂至且盡

矣我 皇考孝思不匱謂斯地不獨龍脈蜿蜒且咫尺 昌陵得  
遂依依膝下之素志歲在戊申春三月 上蒸詣 諸陵至龍泉  
峪大殿 召<sub>子臣</sub> 同蒸親王奕訢至 御座傍 命讀 硃諭藏  
於殿內東楹蓋 聖意深遠默定 陵名見已蒸鑄在石牌坊南  
北面遵 遺訓也已酉冬遇 皇祖妣孝和睿皇后大故 皇考  
哀毀異常雖 聖躬違豫已久猶必盡禮盡哀恪遵 成憲奉安  
梓宮於綺春園迎暉殿至正月十一日猶 躬親叩奠至十四  
日卯刻 召<sub>子臣</sub> 至寢宮並 召宗令御前大臣軍機大臣內務  
府大臣等同至寢宮手宣 硃諭立<sub>子臣</sub> 爲皇太子命王大臣等  
同心贊輔總以國計民生爲重無恤其他並 賜御用冠服朝珠  
親爲加諸頂項聞 命之下感悚交集雖自陳愚昧辭卻再三而  
聖意彌堅以<sub>子臣</sub> 年幼才疏身承未有之 恩思何以仰報

付畀之重修身寡過以慰 聖懷懼滋甚焉方冀日承 庭訓長

侍 慈顏孰意降 旨甫經半日積氣上壅於是日午時 龍馭

上賓 子臣 攀號莫及猝遇鞠凶嗚呼痛哉因與顧命諸臣公啟密

緘始知 皇考於道光二十六年六月十六日密將 子臣 名書置

祕函豫立儲位大寶艱哉 深恩莫報並書皇六子奕訢封爲親

王暨不准行 郊配 廟享之儀撤去恭奉筆墨皮冠皮衣之類

以及陵寢斷不可建立大碑樓連稱聖德神功字樣如有撰述可

於小碑樓碑陰鐫刻 聖德謙冲 聖慮周詳椎心泣血不忍讀

矣回思丁未春 祈穀大祀 命 子臣 偕惇郡王奕諒詣 壇習

禮至戊申 祈穀大祀卽 命 子臣 恭代默膺神器 聖眷優加

撫今憶昔感畏愈深予小子德薄任鉅雖懷遵 訓諭而智短才

疏於一切知人安民之事詎敢仰跂 皇考况 皇考屢值艱鉅

聖意時以蒼生爲念 仁參嶠載蓋自海疆滋擾將及八年噫

無一日 聖懷得寬慰也 子臣 席大業之隆幸邁罕有之 恩若

弗兢業自持曷能仰答 高厚於萬一嗚呼痛哉敬卜於咸豐二

年壬子春三月二日丑時恭奉 宣宗效天符運立中體正至文

聖武智勇仁慈儉勤孝敬成皇帝梓宮安葬 慕陵以 孝穆溫

厚莊肅端誠孚天裕聖成皇后 孝慎敏肅哲順和懿熙天詒聖

成皇后 孝全慈敬寬仁端慈符天篤聖成皇后祔含淚濡毫以

誌永慕云爾○以大葬禮成予襄辦王大臣等加級執事官員升

用有差○以恭題 神牌加裕誠祁窩藻太子太保○予值班扈

送之王公大臣官員並直隸員弁加級升敘有差並賞守護 慕

陵及隨從拜唐阿兵弁沿途兵丁一月口糧並夫匠等銀○癸丑

上回鑾○丙辰以 神牌黃輿回京賞護送之王公大臣員弁



加級兵丁半月錢糧及校尉等銀○丁巳 上奉 皇貴太妃還宮○恭奉 宣宗成皇帝 孝穆成皇后 孝慎成皇后 孝全成皇后神牌升祔 太廟安奉 神牌於 奉先殿翌日頒詔天下○諭軍機大臣等前據薩迎阿等奏稱蒙古右翼郡王仍請暫居永安俟二年後卽令撤回原牧見距上年查辦之後已屆一年舒興阿擬限至本年夏季草青水旺之時飭令歸還原牧以符舊制自應如此辦理著舒興阿哈勒吉那妥爲曉諭該郡王等徙居永安業經數載雖積久困弱必應思自強之計且止攜阿勒巴圖五十餘戶其餘九十餘戶仍置卡外難於兼顧愈渙散愈形疲弱况原牧地方水草茂盛棄之更爲可惜見在奏奉諭旨令爾仍回故地正望爾等積漸自強代爲慮及久遠之意如此明白開導該郡王等自必感激懷遵不至日久遷延妄生希冀至察漢托洛亥

等處蒙古防兵向係五百名見據查明該蒙古生計艱難著卽裁撤一半仍酌留兵二百五十名分班輪派以備偵探野番接遞文報等項差使該督等卽會同籌議明定章程並剴諭各蒙古經此次變通調劑以後務各勤奮當差毋得自甘怠惰仍蹈舊習也將此各諭令知之○庚申廣西巡撫鄒鳴鶴奏匪踞永安於二月十七日丑刻冒雨突圍由東路奔竄大兵跟蹤追勦殲斃賊匪數千名並擒獲逆首洪大泉因山徑斗險大霧迷漫鎮將遂致陣亡臣聞信後卽飭臬司姚瑩馳入永安州城安撫百姓一面與賽尙阿籌議嚴守要路並於近省各要隘分派員弁帶領兵壯會合團練節節防堵不敢稍涉疏虞見在賊匪紛竄查大廣地方及昭平之大洞龍竄荔浦之天平坳等處均爲該匪奔逸之路請飭下兩廣督臣廣東撫臣於東西兩省毗連處所遴派兵勇實力巡防其湖

南與粵西接壤尤宜豫籌防守請飭下湖廣督臣妥籌堵禦毋令  
匪蹤闖入 上諭內閣鄒鳴鶴奏克復永安州城生擒逆首先行  
馳報一摺逆首占踞永安州城經官兵疊次攻剿斷其接濟賊勢  
窮蹙於二月十七日丑時冒雨突圍由東路奔竄大兵跟蹤追剿  
殲斃賊匪數千名並擒獲逆首洪大泉一名賊眾見已分竄鄒鳴  
鶴聞信後卽飭臬司姚瑩馳入永安州城安撫百姓見與賽尙阿  
等議添派員弁嚴守要路並於近省各要隘分派員弁帶領兵壯  
會合團練節節防堵自不至稍涉疏虞惟該逆等豕突狼奔意圖  
竄擾據稱探聞賊竄之路總在東北一帶務當乘勝追截悉數殲  
擒勿使兇醜復熾諒賽尙阿等必能妥速籌畫相機勦辦也○諭  
固山貝子奕劻之父綿悌母那拉氏著加恩准其一併追封其繼  
母棟鄂氏照例毋庸給封○諭軍機大臣等據鄒鳴鶴奏克復永

安州城生擒逆首先行馳報一摺據稱二月十七日丑刻賊匪冒雨突圍由東路奔逃我兵跟蹤追剿殲斃數千人擒獲逆首洪大泉一名因山徑斗險大霧迷漫鎮將遂致陣亡賊眾見已分竄等語前據賽尙阿奏東路之古束沖口等處被賊屢次攻撲此次逆匪是否卽由此處竄越昭平縣之大洞龍寮荔浦縣之天平坳等處見在是否均有賊匪其大廣地方究係何縣所轄務須偵探明確寔力堵截其前踞永安州時因我軍遷延不能立時攻剿致彼得以從容布置深溝高壘抗拒多時見因圍困日久窮蹙奔逃正可乘其倉皇渙散之時分路截擊悉數兜擒斷不可再有延緩使該匪得以乘閒擄掠飽颺而去若或復踞城邑逆燄熾張朕惟賽尙阿是問該大臣親督追剿非前次遠駐省城可比見在駐紮何處朕心實深繫念向榮駐守荔浦自係擇要防守惟見當追捕喫

緊之際該提督駐守一隅是否足資策應此時平樂府城最關緊要該大臣所派鎮將是否得力總期以有用之材置之扼要之地方爲計出萬全賊匪四竄蹤迹靡常省城重地務須督率文武激勵兵練加意防堵該撫如須出省帶兵接應勿稍拘泥致誤事機至波山艇匪見在梧州一帶沿江滋擾恐與永安竄匪句結爲患已諭令徐廣縉等添派將弁迅速會剿此時勞崇光計已自南太移兵馳赴該處著該大臣等嚴飭該藩司及在事文武合力勦辦並飭令沿江地方各官認真防堵儻堵勦不力致城池或有疏失必將該地方官重治其罪其餘一切情形俟賽尙阿馳報到日再降諭旨將此由六百里諭知賽尙阿鄒鳴鶴並傳諭勞崇光知之○諭本日據鄒鳴鶴奏克復永安州城生擒逆首先將辦理情形馳報見在探知大廣地方及昭平之大洞龍寮荔浦之天平坳等

處均爲賊匪逃竄之路東西兩省毗連處所尤不可不豫爲堵截  
著徐廣縉等迅派文武員弁嚴密巡防不准稍有疏虞致滋蔓延  
其波山艇匪尙在梧州一帶勢頗猖獗若與永安逆匪勾結兇燄  
益張前已諭令勞崇光由南太馳赴該處督兵攻剿並著該督等  
選派得力員弁配帶礮船會同粵西將弁合力兜剿迅速殲除至  
凌十八股匪圍困日久想不至再有竄逸此時如已剿滅該督卽  
統率大兵前往廣西會剿以期剋日蕙功將此由六百里諭令知  
之○諭本日據鄒鳴鶴奏永安逆匪於二月十七日冒雨突圍由  
東路奔竄湖南與粵西毗連處所尤宜加意嚴防著該督卽飭地  
方文武員弁於交界要隘分投防堵不得以逸匪距境稍遠遂形  
疏懈至逆首洪大泉一犯據稱二月二十五日解到廣西省城已  
加派弁兵護送過境如係將該犯押送進京路經湖南湖北務須

派員小心防護仍查看情形儻恐或有疏虞卽一面奏聞一面就地正法著程喬采酌量辦理可也將此由六百里諭令知之○辛酉賽尙阿奏永安逆匪突圍逃竄官軍克復州城並擒獲逆首洪大泉惟連日大雨雲霧迷漫山徑險滑烏蘭泰等督兵追剿中途被賊衝突以致官軍失挫總兵長瑞等陣亡見探聞逆匪由大崗等村竄出昭平屬之三昧窠天平坳至大小古西村及福祿村等處並訊據生擒賊匪供稱該逆不上窺平樂卽下駛梧州已飭各將士率兵勇分投堵擊見聞賊之頭隊已到陽朔縣屬之高田墟又據諜報有賊數千由山路越至臨桂縣之六塘距省六十餘里臣當飛咨撫臣鄒鳴鶴晝夜嚴防並調向榮等帶兵馳援省垣以固根本 上諭內閣賽尙阿奏收復永安州城生擒逆首並見在剿辦情形一招永安州城逆匪逃出分竄我兵四面兜剿疊有斬

戮見獲之洪大泉卽逆首洪秀泉之謀主見已派員檻送京師此次統計殺賊不下二三千名生擒百餘名惟因連日大雨山險路滑以致總兵長瑞等同時陣亡覽奏實深悼惜烏蘭泰向榮督兵進剿雖殲擒賊匪甚多究因銳進失機咎無可辭著一併交部嚴加議處賽尙阿調度失宜著交部議處見在賊勢渙散省垣重地自應嚴加防守其平樂梧州兩府地方水陸要隘均須併力堵截該大臣見駐永安著卽嚴飭文武員弁督帶兵勇分路截擊並著鄒鳴鶴飭令各地方官激勵團練紳民隨地堵剿勿令竄逸○諭直隸天津鎮總兵長瑞甘肅涼州鎮總兵長壽先後派往廣西剿辦逆匪跟蹤追剿同時遇害實堪憫惻因思伊父塔思哈於道光年間在喀什噶爾幫辦大臣任內打仗陣亡今該鎮兄弟復能爲國捐軀洵屬忠貞世篤著俟軍務告竣卽於殉節地方建立專祠



同時陣亡各員一併附祀以慰忠魂伊母見在閩省著賞銀三百兩由福建藩庫發給卽著該督撫並沿途地方官妥爲照料護送回京○諭軍機大臣等賽尙阿等奏逆匪被攻逃竄收復永安州城並因追剿致有挫失見在分投堵截一摺又據片奏逆匪逼近省垣等語覽奏實深憤懣永安逆匪竄出之後我兵奮力窮追已出龍寮山口斬擒不少功在垂成乃因大雨山徑險滑雲霧迷漫被賊衝突以致鎮將陣亡逆燄復熾實堪髮指見據該大臣奏稱賊之頭隊已到陽朔縣屬之高田墟復據鄒鳴鶴馳奏二月二十七日接據諜報有賊數千人已由山路越至臨桂縣之六塘地方距省僅六十餘里見在向榮劉長清等帶領兵壯由間道疾趨抵省民心自可大定惟是賊匪四竄詭譎異常難保不爲聲東擊西之計省城緊要固宜加意巡防嚴密布置但恐我軍全力保衛省

垣而賊或乘機他竄上窺平樂下趨梧州搶掠郡邑其勢必更滋  
蔓向榮等馳抵省垣是否列兵城外爲犄角之勢閒出奇兵扼賊  
奔竄之路抑係拘守城中僅以登陴塞責見在四鎮陣亡各路追  
擊截堵派委何員管帶兵勇以目下情形計之省垣最要平樂梧  
州兩府地方均極喫緊正可乘賊倉皇未定之際腰擊尾追俾彼  
不得喘息無暇撈掠方爲上策斷不可株守一隅稍有延緩使該  
匪得以擇險而居從容布置勦辦更難得手賽尙阿駐紮永安州  
城是否足資控制抑或移營平樂居中調度烏蘭泰分守荔浦果  
否扼要此中緩急輕重情形均著該大臣相度機宜妥速籌辦鄒  
鳴鶴督辦團練如果著有實效此時逸匪經過地方自應各有準  
備不致受其蹂躪若專恃兵勇臨時調撥始資保護所謂團練者  
安在耶該撫調撥兵勇以資守衛省垣固應如此辦理然逆匪分

竄無定設若再踞別城亦該撫統轄之地斷難辭咎鄒鳴鶴豈可胸無成竹徒涉張皇至波山艇匪見在梧州一帶滋擾永安竄匪亦有前赴梧州之信若令句結爲患益甚見雖諭令徐廣縉等酌量帶兵馳赴該處會剿尙恐緩不濟急勞崇光此時計已馳抵梧州著卽督飭地方文武激勵紳民兵勇設法剿除此股賊匪萬勿令永安竄匪與之糾約賊首僅獲洪大泉一名其洪秀泉等匪有無被我兵殲斃及分竄何處均著確查具奏將此由六百里諭知賽尙阿並諭鄒鳴鶴知之○諭據賽尙阿奏收復永安州城鎮將追賊致有挫失見在嚴飭各路兵勇堵擊竄匪偵知該匪由大崗等村竄出昭平屬之三昧搖天平坳至大小古西村及福祿村等處並訊據生擒賊匪供稱該逆等不上窺平樂卽下駛梧州至波山艇匪見亦在梧州江面一帶盤踞已飭勞崇光前往防剿此次

逆匪雖窮蹙出逃勢尙猖獗且分路滋擾見在我軍新挫兵力尙單著徐廣縉體察情形如能親往督辦卽迅帶兵勇馳赴兩省要隘地方相機堵剿至凌十八股匪尙未殲除尤不可稍涉鬆勁若徐廣縉出省會剿所有羅境匪徒或交葉名琛或交陶煜文專司督剿如葉名琛出省卽著柏貴暫畱廣東辦理地方事務該督撫酌量緩急勿誤事機是爲至要將此由六百里諭知徐廣縉葉名琛並諭令陶煜文知之○諭本日據賽尙阿鄒鳴鶴馳奏逆匪紛竄逼近省城先後咨調湖南精兵來粵迎擊堵剿該督諒已選派員弁帶兵馳赴廣西會同剿辦見在永安逆匪潰圍奔突蹤迹靡常難保不逃入楚境著程喬采於鮑起豹余萬清兩員內酌派一員在兩省毗連處所扼要駐紮督飭弁兵實力巡防毋任鄰匪乘間竄入致滋句結將此由六百里諭令知之○諭陸建瀛楊以增

奏稱目前次門占蟄塌後金門愈刷愈深大溜趨注兩壩續作之  
工復有蟄塌十餘丈業已趕築攔黃堰並搶築護埽多拋碎石慎  
重趕辦惟見在桃汛方漲若復遷延旬日水勢愈大人力必愈難  
施儻有疏失不特數百萬帑金消歸烏有其糧船運道災區撫恤  
又將如何辦理該督等自問能當此重咎耶著陸建瀛楊以增督  
率在事文武員弁竭力趕辦於慎重之中務求妥速之法懍之將  
此由四百里諭令知之○予廣西陣亡總兵官長瑞長壽董光甲  
邵鶴齡祭葬世職○癸亥諭軍機大臣等據鄒鳴鶴馳奏賊匪竄  
偏省城官民竭力守禦情形一摺覽奏彌深憤懣省垣城池堅固  
紳民鋪戶勦力同心人思敵愾其防守機宜諒該撫亦早爲豫備  
必不至稍有疏虞第賊眾蟻聚城外少延時日卽恐其窺築壘  
詭計多方而城內火藥鉛丸有應接不暇之勢自應飛調各路援

兵星馳赴救前經該撫咨調之湖南兵二千名與粵西最近之永州鎮標各官兵並粵省提標金州各營兵六百名著鄒鳴鶴迅速飛催赴援其烏蘭泰先經賽尙阿派往荔浦所帶兵勇三千名與許祥光張敬修李孟羣所帶各勇諒可早到該匪大隊北竄必慮官兵之躡其後但使首尾不能兼顧則前有堅城後有勁旅逆匪進退失據安知不轉敗爲功該撫城內布置果能周而當與烏蘭泰向榮等密商突出奇兵於該匪圍攻稍懈匪眾所不及防之處或於昏夜風雨之中內外夾擊不但可以解圍並可因其散漫四郊並無巢穴可守乘機制勝一面偵探該匪自永安竄出後攜帶婦女輜重安頓何處恐修仁荔浦陽朔一帶山徑叢雜別有險要可以踞守卽當分兵前往勦襲令攻城之匪聞而疑懼亦釜底抽薪之法我軍雖新有挫失而賊匪亦係鋌而走險奔突無定此時

該撫正當持以鎮靜勿露張皇該匪狡譎異常恐有奸民潛相勾結洩漏機宜尤須與合城文武官紳慎密搜查毋令溷迹僨事至賽尙阿暫駐永安聞警後是否已移營北指各路兵勇赴援省城又恐賊匪回竄平樂與修荔各屬地方並恐由賀縣富川灌陽全州各路竄入湖南由昭平等處下趨梧州揚言圍撲省城使我兵盡力赴援於分竄之路轉多疏縱應如何調度分投遏截該大臣定已計及荔浦糧臺重地與各處糧臺務飭在事員弁加意保護不可偶有疏失所有波山艇匪切不可令與該逆匪大隊聯蹤爲患勞崇光諒已馳抵梧州務將艇匪設計殲擒並密探該匪與艇匪勾通奸細偵獲懲辦鄒鳴鶴兩次奏報爲省城防守緊要於賽尙阿見在大營情形未經奏及朕不勝焦慮該大臣當與鄒鳴鶴等速籌期辦聲勢聯絡隨時將見辦情形馳奏以慰廑念其軍需

一切如何調撥濟急之處亦著悉心籌畫是爲至要將此由六百里加緊諭知賽尙阿鄒鳴鶴烏蘭泰向榮並傳諭勞崇光劉長清等知之○諭本日據鄒鳴鶴馳奏賊匪已直逼桂林省城見在官民竭力守禦專望各路援兵攻剿等語省垣重地豈可稍有疏虞見在城內向榮等帶兵防守烏蘭泰等亦馳赴救援但恐兵力專注省垣南路未能兼顧且波山艇匪盤踞梧州恐乘我兵調撥之際與該匪會合更屬滋蔓難圖著徐廣縉等卽遵前旨迅速籌計如該督帶兵前赴廣西梧州一帶會剿其羅境匪徒卽交葉名琛或交陶煜文專司督剿萬勿疏縱想該督接奉前旨已通盤籌畫不至遲延誤事也將此由六百里加緊諭令知之○諭前因廣西逆匪北竄逼近省城降旨令程裔采選派員弁前往會剿並令於交界隘口分路嚴防本日據鄒鳴鶴馳奏賊已直逼桂林省城官



民竭力守禦專望各路援兵攻剿等語廣西省垣重地豈可稍有疏虞著程喬采卽飭前任提督余萬清督帶精兵探明賊匪蹤迹馳往廣西迎擊既可杜其奔竄湖南之路卽可會同各路援兵併力救援桂林該督接奉此旨卽飭余萬清星夜遊行不可稍涉延緩致誤事機至湖南與廣西毗連要隘著該督飭令鮑起豹分飭弁兵實力巡防毋任鄰匪乘間竄入至該督駐紮衡州是否足資策應並著酌量情形慎重防禦毋稍疏忽將此由六百里加緊諭令知之○甲子諭軍機大臣等本日據程喬采馳奏探聞粵匪逃竄籌辦防堵情形並續調官兵一摺永安逸匪竄擾桂林圍撲城垣昨降旨諭令程喬采調兵赴援茲據該督奏稱前派往廣西兵一千名因湖南防堵喫緊仍行截畱見在桂林是否解圍殊深懸繫所有另調赴永州備調之官兵一千名計已星速調發著仍遵

前旨卽派余萬清帶領前赴桂林以資策應仍由該督酌量辦理  
毋誤事機其續調湖北兵一千名並著飛咨調至楚粵交界以備  
緩急該督仍會同提督督飭文武員弁於近粵要隘加意嚴防毋  
稍疏忽將此由六百里諭令知之○諭前因軍需河工用度浩繁  
經戶部籌議遵旨行知山西陝西河南四川等省令各督撫勸諭  
官紳士民量力捐輸以濟要需見在廣西軍務未能剋期竣事籌  
解軍餉仍當寬爲儲備著戶部於未經行知各省分體察情形分  
別籌議此項捐輸在下抒急公之誼在上施獎勵之恩歷有成案  
可循惟在得人而理務令各該督撫飭屬妥爲曉諭毋許抑勒苛  
派致滋擾累或官吏因緣爲奸婪索中飽卽著嚴行究辦粵西一  
日不靖朕心一日不安卽各省官紳士民當亦同仇敵愾踴躍輸  
將各該督撫亦必能善體朕心妥速辦理其應如何通行之處該

部速議具奏將此諭令知之○丁卯廣西巡撫鄒鳴鶴奏逆匪連撲省城臣會同提臣向榮督帶弁兵激勵紳勇於二月二十九日將撲城之賊擊斃甚眾三月初一日卽選同知直隸州謝繼超等帶兵絕城將城外賊踞空房縱火焚毀初二日又派湖南兵絕城衝殺斃賊數十名奪獲大黃旗二桿初三日參將蔣福長擊斃賊二十餘人奪獲器械多件初四日參將瞿騰龍遊擊游坤垣都司朱占釐守備米興朝等連放大礮先後斃賊百餘賊勢大挫不敢近城再在籍官紳龍啟瑞朱琦等督帶團練協同守禦並搜捕奸細鄧小仔等二十餘名審明正法見在人心安靜賽尙阿已飭令署臨元鎮總兵王錦繡署徐州鎮總兵松安泗城府知府李孟羣各帶兵勇赴援均已先後趕到前任湖南提督余萬清亦督帶楚兵馳往應援此次攻城賊匪約有二三千人該匪揚言尙有六七

千人踵至臣惟有督率文武與在城紳士設防固守相機勦襲  
上諭軍機大臣等據鄒鳴鶴馳奏連日抵禦攻城逆匪疊經獲勝  
一摺並片陳各情形逆匪竄至城下據云約有二三千人是否有  
逆首在內該逆自永安竄出後未必全赴省城究竟共分幾股屯  
聚何處均未據該大臣與該撫詳細奏到賊匪揚言有六七千人  
隨後踵至亦須時加偵探飭令各路團練嚴密豫防儻能出奇制  
勝內外夾擊正可轉敗爲功賽尙阿是否尙在永安數日未據奏  
到朕心甚爲懸念該大臣駐紮處所與省城必須聲息相通設爲  
賊匪梗阻以致彼此不相聯絡甚爲可慮至荔浦爲糧餉重地前  
據賽尙阿烏蘭泰奏帶兵三千赴荔浦追截賊匪今賊匪已至省  
城尙未知烏蘭泰見在何處荔浦儻有疏失關係非輕烏蘭泰豈  
尙按部徐行耶著賽尙阿查明迅速馳奏前次四鎮陣亡兵勇共

傷亡若干名並見在平樂梧州等處如何防剿之處亦著查明具奏至該撫請撥餉銀已飭戶部速議各省籌款之艱該撫既能縷晰陳之豈內帑支絀獨不知耶軍需河工各款籌畫必須兼顧該撫總司軍餉亦應通盤覈計也將此由六百里諭知賽尙阿鄒鳴鶴並諭向榮劉長清知之○湖廣總督程喬采奏查楚省邊防江永一帶爲最要鄰氛逼近尤屬萬分喫緊桂林重地解危救困又不能稍緩須臾再四妥籌於江永各要隘內酌撥官兵千名飛咨提臣余萬清統帶星速馳赴桂林省城並屬以何路迅捷卽由何路行走仍恐兵力單薄復飛調營兵千五百名以五百名同前調鎮寧等處之兵赴永防堵其餘千名應否馳赴粵西聽候續調上諭逆匪攻撲廣西省城經鄒鳴鶴等協力剿擊連次獲勝守禦尙屬嚴固惟該逆匪等旣不得肆志難保不分逸滋擾楚省邊界

地方倍形喫重程喬采見又續獲習教傳徒匪犯業經審明按律懲辦仍著督飭各州縣加意嚴防毋稍疏懈前任提督余萬清見已帶官兵一千名馳赴桂林援應甚爲迅速其續調兵一千名仍酌量緩急以備調用鄒鳴鶴咨商程喬采由衡州移紮零陵以期就近策應之處諒該督先已籌及矣將此由六百里諭令知之○命禮部尙書何汝霖無庸在軍機大臣上行走○予廣西死事參將長明祭葬世職○戊辰賽尙阿奏逆匪全數竄撲省垣向榮兵抵桂林人心得以安定連日設法抵禦疊獲勝仗惟烏蘭泰帶兵追賊至省城南門外將軍橋甫經接仗身受礮傷退回良豐復由良豐回至六塘致將軍橋險隘被賊占踞修立寨柵失此機會殊爲可惜臣已由荔浦帶同總兵經文岱等移營陽朔該處切近桂林督兵攻剿聲勢旣易聯絡兼可杜賊回竄之路 上諭內閣賽

尙阿奏逆匪竄擾省城派兵防剿見在移營陽朔督辦情形一摺  
昨據鄒鳴鶴馳奏省城防守嚴固並連日出城截剿各情業經降  
旨飭令賽尙阿等分扼要隘嚴防竄匪茲據奏稱竄擾省城之賊  
疊受懲創見在內守既嚴外援續至該大臣已由荔浦移營陽朔  
該處切近桂林督兵攻剿聲勢聯絡兼可杜賊匪回竄之路著賽  
尙阿仍遵前旨相機剿辦與鄒鳴鶴向榮等內外夾擊務將分竄  
之匪迅速撲滅以衛省垣毋稍延玩○諭軍機大臣等賽尙阿奏  
稱逆匪圍撲及我兵抵禦各情逆匪全數北竄直撲省垣幸向榮  
帶領兵勇間道先抵桂林人心得以安定連日復激勵在城兵練  
紳民設法抵禦疊獲勝仗布置一切尙合機宜惟烏蘭泰帶兵追  
賊已至省城南門外將軍橋地方甫經接仗獲勝又因身受礮傷  
退回夏豐復由夏豐回至六塘以致將軍橋險隘被賊占踞修立

寨柵失此機會殊爲可惜烏蘭泰素有謀略何以前次永安追賊墮澗與秦定三帶兵退回此次又因受傷退回六塘其調度布置何以漫無把握見在受傷輕重若何有無遷延情事卽行查明具奏秦定三暫領烏蘭泰軍由南路進攻是否足恃此時賊勢前有堅城之阻後有援兵追擊乘其渙散內外夾攻不但城圍立解且可大挫賊鋒若委任非人再有疏失或遲延時日使賊占踞要地又成巢穴勦辦更難得手該大臣親督兵勇並帶同總兵經文岱等拔營前進以爲後路聲援兵力旣壯人心益固正當趁此聲勢出奇制勝以期一鼓殲除該省北門倚山爲城尤當豫爲嚴防萬不可爲賊所踞余萬清想已帶兵由湖南馳到一切情形仍當隨時知照程喬采驛路文報勿致梗阻張國樑所帶壯勇見亦催調來省其波山艇匪如何勦擊勞崇光是否已抵梧州該大臣務須



通盤籌畫酌量緩急毋再貽誤將此由六百里諭知賽尙阿並諭令鄒鳴鶴知之○諭見在永安逆匪竄徧桂林省城經賽尙阿調撥各路兵勇赴援堵擊其勞崇光帶赴梧州之兵勇二千餘名亦經調赴桂林梧州兵力較單恐艇匪乘機勾結愈肆滋擾著徐廣縉迅卽督帶兵勇前往剿辦毋誤事機至凌十八股匪或交葉名琛或交陶煜文專司堵剿仍遵前旨酌量辦理可也將此由六百里諭令知之○予宋臣韓琦從祀 文廟○己巳以剿賊失律降賽尙阿四級革向榮烏蘭泰職均畱任拔烏蘭泰花翎○庚午諭內閣京師自二月以來雨澤稀少朕於宮內齋心默禱尙未渥沛甘霖見在已交立夏農田望澤孔殷朕心彌深焦灼因思時雨愆期恐刑罰不中所致近聞刑部繫囚甚多亟應迅速清理以冀感召和甘著該部堂官督飭承審各司員將見審各案認真細心推

鞠當罪者卽行擬結無辜者亦免久羈其有問徒以下輕罪人犯及干連待質例應取保候審者立予清釐省釋毋稍稽滯以示矜恤而返祥和○辛未工部左侍郎呂賢基奏 皇上登極以來特詔求言內外臣工各有條奏近來奏牘稍稀偶有條陳不過毛舉細故無關大體今粵西會匪滋事二年以來命將出師竟無成效甚至圍攻省城大肆猖狂南河豐工未能合龍重運之阻滯災民之屯聚在在堪虞河工費已四五百萬軍需費已一千餘萬計臣束手無措必至掎克朘削邦本愈搖年來諸務因循日壞一日易曰大蹇朋來正在此時敬祈 皇上特旨訪求直言令大小臣悉去忌諱一改泄泄沓沓之故習於時政闕失有可補救者各抒所見盡言無隱以期集思廣益 上諭呂賢基奏請求直言一摺朕登極後特詔求言內外臣工條奏凡有可採取者均已見諸施行

見在粵西軍務未平豐北河工漫口未合內外諸務因循未能振作畿輔自入春以來缺少雨澤朕焦勞宵旰方矢憂勤惕厲之忱爾諸臣目擊時艱自當與國家同其休戚豈可泄泄沓沓自謂循分盡職乎著再申諭各部院大臣九卿科道等有言事之責者於政治得失民生利病有可補偏去弊力圖挽救之處各據見聞直陳無隱朕非好諛惡直之主亦非欲博下詔求言之名爾諸臣其各力矢公忠悉心獻替惟不得徒託空言浮泛塞責若或受人指使詐僞居心或欲沽直名置國是於不問殊負朕集思廣益之苦衷也○癸酉鄒鳴鶴奏逆匪於三月初六日夜退屯對河各處僅向東西南及文昌四門不時遙放槍礮未經逼近城下初七日有千餘賊至飛龍橋渡河直撲北門當調官軍出擊斬首十餘級賊即退往各村藏避午刻又率大隊冒雨蠶擁而來復攻松安王錦

繡營盤提臣趕至北城督戰並調湖勇助剿李孟羣帶良勇知縣銀沆帶福勇槍勇由北門外繞出賊後對擊多時賊始潰走追至飛龍橋橋窄人多賊匪擠落水中淹斃者不少初八日西門南門外空房並對河東岸均有賊藏匿出入文昌門外象鼻山下泊有賊船多隻初九日賊復向南門文昌門連開大礮俱經兵勇擊退初十日提臣督率紫營城外之兵勇由麗澤門整隊前往望見古牛山上聚賊多人我軍連放槍礮並拋擲火罐羣賊滾落山下者甚眾餘匪由山背竄逃偵探賊眾男婦約四五千人大半廣東口音或聚對河東岸各村或屯西鄉五里墟或分處花橋四圍樓將軍橋頭塘等處其大小船四十餘隻停於紫家洲象鼻山背賊首係楊秀青蕭潮濱並傳言洪秀泉聿政亦在其內見在城內添備滾木擂石石灰袋水噴筒等件以資抵禦城外續到貴州鎮總兵

秦定三副將常祿兵一千名勇二千名湖南永綏協副將馬龍兵  
千餘名右江道張敬修東勇三千餘名援兵雲集臣與提臣商定  
機宜卽日分路進剿臣賽尙阿於初四日由永安移紮荔浦卽可  
旋至陽朔日來文報繞道能通音問時至不致隔閡又奏查賊情  
刻有變遷機宜亦刻有更易賽尙阿日內移紮陽朔距省雖僅百  
里中間賊匪隔斷止有間道往來若事事商酌後行旣恐中途漏  
洩且往返需時必致貽誤大事臣再三審度所有目前戰守諸事  
其可稍緩者仍咨明賽尙阿商定如係刻不可緩者卽由臣與提  
臣會商密計立時舉行適接賽尙阿來函以諸軍統領乏人屬卽  
就近會同向榮調遣各軍意見正相符合又奏此次賊攻省城各  
文武固守十一晝夜疊次接仗俱能志切同仇謹將湖南綏靖鎮  
總兵和春等先行開列懇恩獎勵 上諭軍機大臣等見在各路

接兵陸續到齊並防守兵勇計有萬餘名省城內外布置周密兵力不爲單弱逆匪撲城我兵分門守禦疊次出擊亦既大挫其鋒惟省垣重地豈可徒事株守急宜乘賊進退失據之時出奇制勝該撫與向榮等此時想已督飭將弁分路進剿襄尙阿見駐陽朔距省匪遙正可與省城聯絡聲勢內外夾擊且逆首洪秀泉楊秀青蕭潮濱韋政等聚集一處尤不可失此機會務須激勵將士合力痛剿以期聚而殲旃渠魁旣除餘匪自可以次剿辦據稱賊眾男婦約有四五千人分踞各村並將軍橋頭塘等處若不及早攻剿勢必樹柵立寨據險負嵎仍爲窺伺省垣之計象鼻山爲水路要隘賊匪搶占必應痛加剿擊勿令據險北城外各山及水路亦宜嚴密防堵不可令其乘間竄踞所稱匪船四十餘隻停於紫家洲及象鼻山之背婦女輜重俱在其中未始非因省垣堅固爲奔

竄他郡之計梧州一帶偵探防堵均關緊要勞崇光計已馳抵梧江著卽督率地方文武併力剿除艇匪徐廣縉接奉前旨想已督兵來粵矣其毗連楚粵各界尤宜隨時知照程喬采分兵駐守不可稍有疏虞余萬清如已帶兵抵粵卽可合力兜剿一鼓殲擒毋得稍存畛域致誤事機烏蘭泰是否仍在六塘其礮傷輕重若何秦定三所帶之兵是否呼應得力著賽尙阿查明具奏該省紳士龍啟瑞朱琦志切同仇協同防禦已有旨交部議敘其餘出力文武紳民人等仍著於省城解圍後覈實保奏儻有守禦不力遷延退避不遵調遣者卽著從嚴參辦另片奏請就近會同向榮調遣各軍等語所見甚是軍務緊急刻有變遷自宜相機行事也將此由六百里諭令知之○甲戌諭內閣徐廣縉葉名琛奏封川江口堵剿廣西匪船大獲勝仗見在分派員弁會剿一摺廣西匪船前

在梧州一帶肆擾經該督等調集兵勇各船派委佛山同知沈保  
頤廣州協右營守備黃者華等會同江口委員嚴密防堵二月十  
四日匪船四十餘隻由梧州順流而下直撲江口委員南雄州知  
州郭超凡督標水師營參將崔大同署水師提標後營遊擊李仁  
安與沈保頤等督率水陸兵勇開礮環攻轟斃賊匪三百餘名生  
擒首逆關亞幅一名並夥犯二十一名餘匪當卽竄逸仍在梧州  
戎墟及榕塘一帶灣泊該督等已分飭郭超凡會同崔大同等督  
帶兵勇馳抵梧州會勦仍飭沈保頤李仁安等扼要嚴防所辦均  
合機宜著徐廣縉卽督飭兩省文武員弁無分畛域合力勦辦務  
將艇匪悉數殲除無任竄逸○諭徐廣縉葉名琛奏攻破新鋪賊  
巢匪首就擒全獲勝仗一摺逆匪顏品喜卽顏三分踞新鋪地方  
夥黨眾多恃險肆劫據該督等奏稱廣東提督陶煜文分派員弁



並知會廣西遊擊雙貴等兩路合剿斃匪多名賊勢窮蹙陶煜文  
及高廉道沈棣輝卽會督員弁進徧賊巢適左江鎮惠慶等設法  
購綾並有頭目潘七大願爲內應卽知會陶煜文等分派兩省兵  
勇訂期四路進攻設伏接應齊抵賊巢該匪開柵衝突兵壯奮勇  
撲前賊眾大潰逆首顏三乘間竄往沖天坳爲潘七大伏兵砍死  
並將匪黨七人一同殺斃柵外逸出之賊殲擒殆盡此股匪徒最  
爲强悍經兩省文武協力攻圍痛加剿洗俾積惡罪魁駢首就戮  
統計剿斃賊匪七百餘名生擒四百餘名各團練拏獲逃匪二百  
七十餘名洵足伸國法而快人心所有兩省出力文武員弁兵勇  
人等著賽尙阿徐廣縉等查明保奏候朕施恩○諭軍機大臣等  
徐廣縉等奏剿辦廉州新鋪賊巢並堵剿廣西匪船及羅境墟逆  
匪各摺片廣東高廉一帶與廣西南太等府接壤盜賊繁多此摺

彼竄首匪顏三業經砍斃其餘黨亦殲揜殆盡惟蘇凝三尙無下落難保不逃竄他處復行句結欽州李士青一股見仍分踞大寺該督務當嚴飭兩省兵勇剋期會剿迅速殲除勿畱餘孽至廣西匪船四十餘隻前在梧州一帶屢肆滋擾復由梧州順流直下經廣東文武兵勇奮力剿截大加懲創該匪仍回竄梧州戎墟及榕塘一帶業經該督分飭郭超凡等帶兵勇各船三十餘隻馳抵梧州會剿自可互相策應惟匪船尙有三十餘隻見因桂林省城緊要該處防兵又復咨調到省兵力較單已疊經降旨令徐廣縉督帶兵勇親赴梧州會剿想該督奉到諭旨必當酌量緩急情形不致顧此失彼藩司勞崇光旣已馳抵梧州乘此匪船潰敗奔竄之時合力堵剿定可一鼓殲滅淨絕根株其凌十八一股坐困羅境斷不可稍疏防範致令竄突陶煜文見旣患病卽著在欽州調理

該督兼署提督如赴梧州即可令葉名琛接辦羅境軍務並署提督篆務高廉文武各員亦卽統歸節制或崑壽署理提督亦好諒該督撫等定知相機應變籌畫萬全以副委任將此由六百里諭令知之○刑部尙書恆春等覆奏囤積私酒人犯請仍照原擬辦理得旨著照所擬辦理嗣後如再有囤積過數者必應嚴懲恆春自任刑部以來諸事廢弛近日尤甚著降爲三品頂帶以觀後效○以常志萬青藜俱爲內閣學士常志由太常寺卿萬青藜由翰林院侍讀學士遷○乙亥 上詣 大高殿祈雨○丙子諭內閣五月初四日 方澤大祀 皇考宣宗成皇帝升配 地壇朕於前一日閱視祝版畢還宮辦事後由東華門出安定門恭詣 皇祇室拈香卽至 宣宗成皇帝神牌黃幄行禮仍進安定門詣 雍和宮齋宿嗣後 地壇大祀俱照例在宮齋宿○河南巡撫調補山東巡撫李德奏據

省南陽汝光各屬與安徽潁州湖北襄陽黃州各府屬並隨州毗連民風強悍素有紅鬚捻匪結黨成羣訛詐搶劫捉人勒贖此孽彼竄騷擾閭閻爲患已久臣此次巡閱營伍沿途紳民呈控新舊盜劫重情牽涉差役庇匪玩縱者不一而足明查暗訪詞多不虛捻匪藉差役爲護符差役以捻匪爲利藪積習已深暨不畏法地方文武往往受其欺蒙卽有訪聞查拏差役先爲通信或糾眾拒捕或暫時散匿此係差役勾通匪徒貽害地方實情若不嚴加擒捕則肆行無忌恐致釀成巨案臣見將訪聞結連匪徒各差役每到一處密速鎖交收禁飭令該管道府嚴訊確情詳辦並先絕其漏洩串通之弊一面嚴飭各州縣協同營汛移會鄰封勒限嚴拏務將有名各匪徒全數弋獲從重懲辦以期盡絕根株亦可使鄰省匪類聞風知懼漸收斂戢之效如地方文武果能實心緝捕將

庇匪差役據實究辦奮勉自新似可寬其既往再行聲明奏請恩  
 施免其失察處分儻仍玩泄因循即嚴行參辦斷不敢稍事姑容  
 得旨辦理認真固顯嫌怨洵不愧疆圻重任使各省督撫各州縣  
 皆能如何患有不破之案卿其移會鄰封俱遵此諭辦理○予  
 廣西永安死事副將阿爾精阿知州吳江等祭葬世職建祠○追  
 予廣西禦賊被害龍州同知王淑元署隆安縣知縣高延祉建祠  
 ○丁丑尊藏 宣宗成皇帝 孝穆成皇后 孝慎成皇后 孝  
 全成皇后 玉冊 玉寶於 太廟後殿○戊寅諭內閣據載垣  
 奏昨日勝保呈遞封奏一件呈遞後復自行撤回本日亦未據再  
 遞著勝保將封奏呈進並將因何自行撤回之處據實回奏○王  
 植以病免以陸元烺署江西巡撫由布政使署○調張芾為刑部左侍  
 郎以沈兆霖為吏部右侍郎由內閣學士遷○濬江蘇淮揚運河○己卯

諭內閣昨降旨令各部院大臣九卿科道各進直言以匡時政本日據給事中陳壇遵旨陳言懇請遇災而懼益深惕畏以召天和而固人心披覽所奏頗合責難陳善之義深契朕衷朕承 皇考付託之重仰惟 列聖勗業艱難天下億兆生靈撫綏懷保責在藐躬自登極二載以來無日不以敬 天愛民爲念兢兢業業夙夜不遑曷敢稍存滿溢之志致開逸欲之萌惟思與中外臣工洗滌前非共圖上理乃因循疲玩積習相沿法令廢弛撫循無術以致盜賊橫行重煩兵力自上年粵西小醜不靖調兵勦辦各屬盜匪漸次解散撲滅獨金田會匪尤爲狡詐兇悍大兵節次進攻相持日久仍被突圍而出甚至挫師折將省城戒嚴前此破陷永安合城文武殉難捐軀迨賊他竄後州城及莫村水竄各處僅畱替病數人是城內居民或不得已而被其裹脅或不甘從逆而遭其

屠戮者不知凡幾見又竄擾桂林省城城外及昭平荔浦陽朔一帶村墟居民諒無不受賊蹂躪焚燒擄掠傷心慘目不言可知赤子何辜毒羅鋒鏑興言及此寢饋難安回思前任疆吏粉飾因循深堪痛恨然勞師糜餉俾么虜小醜未能迅就蕩平皆子罪也而南河豐工漫口至今尙未堵合災民蕩析離居更爲可憫自惟薄德時切憂勤宵旰苦衷原難共喻亦不願天下知惟有自省愆尤倍深刻責而已廣西軍務賽尙阿未能迅速奏功疊予薄懲望其力圖補救以贖前愆見在該大臣駐紮陽朔與省城聲勢聯絡如果能剋日會合攻剿兼扼其南竄之路不難復振軍威滅此羣醜若再曠日無功朕亦豈能寬宥著再申諭賽尙阿及帶兵大員等務各激發天良勿致復蹈故轍國典具在朕非不能執法之主也至廣西紳士居民人等於辛苦墊隘之中舉行團練各衛身家殊堪

軫念見當賊勢奔竄靡常其各一乃心力敵愾同仇或偶被妖賊煽惑或陷賊後革心悔悟自拔來歸者不惟予以自新且當妥爲撫恤有能殺賊自效者更當加以恩獎廣東湖南與廣西壤地毗連疊經諭令該督撫通飭所屬實力防堵仍當申諭士民團集保伍並宜加意綏徠無致驅良爲匪用副朕除害安民之至意該給事中另片奏賊僞軍帥洪大泉擬請毋庸解京等語洪大泉籍隸衡州係從賊夥竄原非首要之匪見旣檻送在途仍著解至京師以憑訊究將此通諭中外知之○諭上年因廣西辦理軍務所有辛亥恩科文武鄉試降旨展至本年與壬子正科一併舉行見在該省軍務尙未蒞事本年正科考官該部例應於五月初旬具題該省各屬士子或舉行團練保衛鄉里或隨同地方文武勦賊立功且恐道路或有梗阻能否如期赴省應試著鄒鳴鶴體察情形



儻本年仍難舉行卽改於來年爲該省特開一科仍倍額取中並  
予廣額該撫卽迅速查明務於五月初旬由驛奏到毋稍遲延○  
諭本日據內閣學士勝保遵旨回奏二十七日呈遞封奏因查有  
應行回避字樣是以自請撤回等語勝保旣呈遞事件又復自行  
撤回殊屬不合著交部察議奏事官常通並著交部議處○庚辰  
諭內閣勝保奏陳時務各條朕詳加披閱所論軍務河工明賞罰  
以振紀綱等語與給事中陳壇所奏大略相同昨已明降諭旨宣  
示中外其所稱近日硃批多而諭旨少又云市井細民時或私論  
主德朕因其語無確指令軍機大臣傳旨飭令據實回奏茲據勝  
保覆奏所云諸臣條奏及交部重案議覆上時奉旨依議發下外  
人不知似宜通行宣示此言未諳政體向來各部奏事有依所議  
行者卽不另降諭旨此係 列聖成憲歷久遵行若每事必特降

諭旨宣示無論勢不能行亦日不暇給矣至副都統慶璽係明降  
諭旨休致本非硃批又非革職勝保所言自係傳聞之誤恆春之  
降三品頂帶因其莅任刑部以來諸事廢弛是以姑示薄懲給事  
中方允鑾則因王柏齡抗租一案上年曾風聞入奏後經欽差侍  
郎及盛京將軍查辦該給事中所奏情形未能確實是以批飭吏  
部以後應升應保不准開列此皆朕黜陟權衡非臣下所能干預  
且恆春降三品頂帶之硃批發下軍機處交內閣卽日發鈔人人  
皆見又何必特降諭旨而後能通示中外乎至所稱游觀之所煥  
然一新等語不爲無因見在重華宮小有工作所云萬方歡樂入  
歌謠楹聯乃嘉慶年間舊句並非新撰若採辦梨園服飾以備進  
奉更無此事至飲博二端朕本無此好萬幾之餘觀書習射游藝  
兼資又何暇爲此無益之舉況時艱孔亟朕方宵旰焦勞豈敢稍

眈安逸且我皇考手諭聲色貨利之戒垂示後人朕惟拳拳服膺日懍憂勤惕厲於深宮獨處之中此間修慎獨之本衷原不期人人共喻也古語云止謗莫如自修勝保採風聞以入告朕卽並無此事亦可引以爲鑑惟勝保既有此傳聞卽宜於原奏內直陳無諱方爲知無不言言無不盡乃隱約其詞迨傳旨詰問始行臚列入奏殊失事君有犯無隱之道念其意存諷諫於朕修身勵行既不爲無補卽不必加以妄言之罪勝保著免其置議嗣後有言責者惟當臚陳實事不得摭拾空談致負朕望○是月貸山西遼州等十一州縣上年歉收貧民倉穀並緩徵保德等九州縣買補節年動缺倉穀蠲緩安徽無爲等三十四州縣及屯坐各衛水災額賦免浙江甯波無徵洋商稅銀免江西節年緩徵銀米

夏四月辛巳朔山東兗州鎮總兵官百勝奏校閱營伍情形得旨

分別責革整頓頗好惟冀汝在任日久時常振作斷不准一奏了事見在天下提鎮大員遇事退後若稍有振作卽被文員駁斥積習既深朕必欲力加挽回俾有猷者不敢謝責疲庸者亦斷難戀棧庶營伍稍有起色不至臨時掣肘也將此殊諭諭令各提鎮知之○壬午常雩祀 天於 園丘恭奉 宣宗成皇帝配享○諭內閣程喬采奏賊匪突入州署劫獄戕官見派文武大員馳拏各犯一摺湖南郴州突於三月十四日有賊匪百餘人夤夜執持刀械入署打毀監獄放出賊犯署知州胡禮箴喝拏被賊戕害並殺斃家丁二名賊匪膽敢恃眾劫獄戕官不法已極卽當嚴行懲辦以儆兇頑據稱該州吏目已會同營弁紳民帶領兵勇擒獲賊匪十餘名復經該督派委永州鎮總兵孫應照臨武營參將強其修署宜章營參將積拉明阿等帶兵剿捕續獲二十餘犯餘匪逃散

居民尙未被擾見已委員馳赴該州提犯訊供等語著程喬采駱秉章卽飭嚴拏逸匪並劫放監犯盡法懲治毋任一名漏網仍查明起釁根由是否因胡禮箴拏辦齋匪劫獄奪犯抑或另有根由據實具奏○諭鄒鳴鶴奏堵剿撲城賊匪情形一摺據稱逆匪屢次撲城湖南官兵縋城殺賊奪獲木梯多件總兵馬龍候補知府陳瑞芝等督帶兵勇由北門外飛龍橋前進與副將美應龍備弁米興邦劉季三萬年新王家冀萬明魁知府李孟羣等分路接應賊眾敗走見在分派各營更番出擊等語永安逆匪竄撲省城我兵屢有斬獲賊勢已挫見在勞崇光所派壯勇計已馳抵桂林余萬清亦可帶兵趕到賽尙阿見駐陽朔務當嚴飭各路援軍剋期進剿與城內文武紳民合力堵擊將著名逆首悉數殲擒毋得稍涉遷延再有疏縱○諭軍機大臣等程喬采馳奏賊匪夤夜突入

州署劫獄戕官等情一摺此案湖南署郴州府知府胡禮箴因查拏會匪嚴緊又將一土棍嚴刑拷訊訪獲齋匪五人收監各匪竟因此挾仇夤夜糾集多人執持刀械撞門進署打毀監獄該署州趕出喝拏竟被各匪砍斃並殺家丁二人賊匪入署搶劫實屬目無法紀惟所稱復仇究係揣度之詞是否該署州辦理不善抑或別有起釁緣由其中有無鄰匪竄入勾結該督見已派委署桂陽州知州李啟詔馳詣該州接署著卽督飭速提已獲各犯訊取確供查明首犯是何姓名夥黨共有若干見獲各犯有無首要該督務當查訊明確據實具奏勿得稍有回護該處居民尤須妥爲安撫以定人心案內逸匪並劫放監犯仍飭迅速查拏毋使一名漏網湖南會教匪徒糾眾結盟擾害良善查緝必應認真惟此輩詭詐多端往往勾串胥役暗通消息查拏稍不慎密最易走漏風聲

滋成事端或任聽吏役訛詐甚至誣良爲匪致令奸徒藉口轉失  
除暴安良之道該督等務須督飭地方各官訪察明確妥速辦理  
於緝捕之中仍寓撫綏之意該省與兩廣毗連更當嚴防鄰省匪  
徒竄入勾結免致蔓延爲患解餉委員乘間赴稟所解餉銀若干  
是否被搶該署州印信文卷有無遺失著一併查明具奏將此由  
六百里諭令知之○以南郊大祀恭奉 宣宗成皇帝升配禮  
成予執事王公大臣官員加級紀錄並賞校尉護軍等一月錢糧  
○程霈采奏臣查楚邊卡隘有五六十處之多昨因粵省告援於  
防兵內抽撥赴剿本境愈形單薄是以復於南北兩省續調官兵  
三千五百名一俟到齊再以千名赴粵仍以二千五百名補防俾  
昭慎重以見在情形而論逆蹤北竄固距江永稍遠而零陵東安  
新甯城步綏甯等縣轉爲切近是楚疆防堵較之前踞永安時尤

爲喫重業將派防江永之道員張其仁派防宜章之總兵孫應照  
飭駐永州府城以壯聲勢至提臣鮑起豹駐守江華縣本屬邊界  
要區此時應毋庸移動庶與臣互相控制策應易周見又酌調鄖  
陽竹山施南黃州德安荊門各標協營兵一千名飭令星速來南  
分別添派堵禦報聞○癸未以恭奉 宣宗成皇帝配 天禮成  
頒詔天下○諭內閣前因內閣學士勝保呈遞封奏復行撤回當  
降旨交部察議並將奏事官常通交部議處茲據吏部遵旨具奏  
並恭查嘉慶二十一年 諭旨按照定例將勝保議以降三級調  
用係私罪不准抵銷常通議以降二級畱任係公罪例准抵銷分  
別請旨勝保前奏時務各條原無不合卽其風聞失實各款朕亦  
念其意存諷諫不加譴責惟既經遞摺擅自撤回實屬有違定例  
嘉慶年間所奉 諭旨杜漸防微具有深意煌煌 聖訓曷敢不



遵勝保著卽照部議降三級調用不准抵銷奏事官刑部員外郎  
常通著照部議降二級畱任准其抵銷並著退出奏事處嗣後各  
衙門及有言責者陳奏事件概不得遞後擅撤奏事官亦不得任  
聽撤回如有率意妄爲者著御前大臣查明卽行參奏○甲申諭  
內閣歷代史書皆以帝王本紀冠諸簡端我朝 列聖相承均經  
國史館恭修 本紀敬謹遵藏伏念 皇考宣宗成皇帝峻德崇  
功顯謨彝訓業經特命開館纂修 實錄見已進呈至十五年允  
宜恭修 本紀垂示後昆著國史館總裁遴派提調等官督率臚  
錄詣 實錄館將業已進呈之書照副本恭繕一分恪遵編纂隨  
時進呈於 實錄告成後陸續辦竣所繕 實錄副本恭藏史館  
以資考證○諭前因王慶雲聯英會同山西巡撫兆那蘇圖奏通  
籌河東醴務酌議畱商改票先課後鹽章程開單呈覽富交戶部

妥議具奏茲據該部逐條覈明分晰具奏如永禁僉商以省拊累  
責成改票以期暢銷革浮費禁攤派以杜虧絀定池價減銷價申  
明畦地租課舊章以免流弊覈料則以輕成本立口岸以便發販  
緝鹽池之透漏堵引地之私售另籌公用酌加鹽斤及潞澤節省  
銀兩歸於通綱攤完各條既經該部悉心籌度分別准行著卽照  
新定章程妥爲辦理整頓鹺務總以裁費緝私爲剔弊大端裁費  
務盡不得名去實留緝私本地方官之責見在池價既定恐坐商  
罔利售私必應認真巡緝不得藉口減費稍存玩泄該撫惟當飭  
屬力除積弊恪守新章鹺務自日有起色儻該官商等有敢阻撓  
廢格以致辦無成效卽著指名參辦毋稍徇隱○丙戌 上行釋  
服禮恭誥 慕陵啟鑾○諭內閣兩廣總督徐廣縉揀帶精兵馳  
驛前赴廣西會同賽尙阿辦理軍務○諭前據季芝昌等奏臺灣

匪徒糾眾結盟豎旗肆搶經該鎮道督飭文武督兵分期首要各  
 犯悉數殲擒當經降旨著該督等飭令該鎮道將辦理情形詳查  
 具奏茲據葉紹春徐宗幹將首從各犯審明分別定擬並聲稱南  
 北兩路安堵如常辦理尙爲妥速葉紹春徐宗幹均著交部議敘  
 其在事尤爲出力之文武員弁紳民人等著查明據實保奏候朕  
 施恩毋許冒濫○諭陸建瀛楊以增奏豐工未能堵合懇請展緩  
 並自請嚴加治罪一摺南河豐北漫口責成該督等辦理堵築由  
 部撥派鉅款以濟工需該督等宜如何盡心竭力妥慎督辦乃自  
 興工數月以來兩次走占以致不克合龍請於霜降水落後補築  
 糜帑殃民曷勝憤懣惟念此時籌辦重運撫恤災民皆刻不可緩  
 之事若將該河督等概予罷斥治罪轉得置身事外楊以增著卽  
 革職暫畱工次督辦河務陸建瀛著降爲四品頂帶仍責令秋天

補築合龍以觀後效轉瞬重運經臨如何設法使無阻滯江南山東一帶被水災民如何撫恤著河道總督漕運總督並地方各督撫等趕緊妥籌辦理所有大工用存料物銀錢覈實收存卽將秋間興築事宜務行籌計具奏其掌管東西壩前經革職畱任之河營參將呂邦治淮徐遊擊闕興邦著卽革任畱工效力掌壩文員裏河同知于昌進外南同知晏晉均著革職畱任責令籌辦重運如再貽誤卽行嚴參其疊次走失埽占照例著賠○賽尙阿奏副都統烏蘭泰被礮傷重於三月二十日身故該副都統秉性忠誠素知兵法詎意陣前猝遭傷挫遂致捐軀且其家太赤貧數代單傳尙無子嗣情形實堪惻憫仰懇照陣亡例從優議卹 上諭都統銜廣州滿洲副都統烏蘭泰自上年派赴廣西勦辦逆匪屢著戰功昨因追擊賊匪身受礮傷方冀調理速痊藉資倚任遽聞溢

逝軫惜良深加恩著照都統例賜卹任內一切處分悉予開復並賞銀一千兩由廣東藩庫交伊家屬祇領送柩回旗著沿途地方官妥爲照料並准其入城治喪烏蘭泰見無子嗣著該旗於本族近支內擇其應繼之人卽爲立嗣應得卹典該衙門察例具奏○諭賽尙阿奏軍務未能肅事自請治罪一摺賽尙阿自督辦廣西軍務以來先曾調度得宜自賊匪竄入永安數月未能攻克及至突圍北竄入諛事機實難辭咎昨已降旨令其戴罪圖功以觀後效若徒以請罪塞責於事何濟見又飭令徐廣縉揀帶精兵馳赴廣西會辦軍務賽尙阿惟當激發天良力圖補救毋徒事虛文自劾爲也○諭軍機大臣等賽尙阿奏自請治罪一摺已明降諭旨暫令戴罪圖功並派徐廣縉馳往粵西會辦矣見在逆匪尙在圍攻省城各處兵力聚於北此該大臣駐紮陽朔省南兵力稍單萬

一逆匪因省城固守難於攻撲復向南路竄突該大臣見帶之兵僅有二千儻致疏虞更屬不成事體本日已降旨飭令四川雲貴各再挑備精兵二千該大臣如有應需調遣之處卽一面奏聞一面飛調應用鄒鳴鶴向榮等守禦省城見與該大臣等聲息相通除事事隨機應變不及往返咨商外其舉劾等事仍當統歸欽差大臣查覈具奏以免兩歧朕聞賽尙阿近日身體多病諒因憂慮所致而本日摺報並未提及患病情形朕心甚爲懸繫已特令徐廣縉迅速馳抵廣西軍營會同辦理徐廣縉到後儻賽尙阿病尙未愈勢難勉力支持當以國事爲重卽將欽差大臣關防移交徐廣縉祇領奏明聽候諭旨又本日賽尙阿奏巡撫鄒鳴鶴自行節制諸軍恐將領莫知所從等語鄒鳴鶴到任時卽以辦團練爲己任見在賊竄省城六塘九塘一帶毫無守禦而前奏省城團練五

萬人似亦並無實際著即會同徐廣縉密查該撫儻有夸大粉飾  
遇事張皇等情即行據實參奏另單開烏蘭泰營內出力各員擬  
請獎勵烏蘭泰見已沒於王事其隨營文武原不宜沒其勞績但  
單內所稱節次打仗出力並未實指時地而文員僅辦理文案所  
請獎勵多屬過優已革遊擊劉文賢本係遣戍人員所請免罪以  
守備補用之處未免太優恐烏蘭泰身後或有冒濫入單人員致  
滋物議著賽尙阿復行查覈另奏請獎再降諭旨將此由六百里  
加緊諭令知之○諭前因廣西軍務喫緊節經降旨著徐廣縉酌  
量情形前赴梧州督剿茲據賽尙阿鄒鳴鶴先後馳奏省城戰守  
情形該匪竄偏省城雖屢被攻擊而勢尙猖獗時已兼旬烏蘭泰  
復因中礮傷亡賽尙阿駐紮陽朔僅有兵勇二千人陽朔爲省南  
衝要重地儻賊匪回竄我兵單弱稍有疏虞更復成何事體且聞

賽尙阿見在患病頗形委頓朕心甚爲焦急本日已明降諭旨令徐廣縉遴選精兵馳驛前赴廣西會同賽尙阿籌辦軍務該督接奉此旨著卽迅速帶兵前往見已諭知徐澤醇吳文鎔等各選精兵二千聽候調遣該督酌量如需此項兵力卽一面奏聞一面飛調但不可專待遠兵致誤機會該督行抵廣西如賽尙阿病勢難支卽將欽差大臣關防接領任事以專責成朕已另諭賽尙阿矣至鄒鳴鶴舉行團練未有成效經理糧餉是否覈實著會同賽尙阿密行察訪如有夸張粉飾等情卽據實奏參至該督馳赴廣西其羅境匪徒卽著葉名琛馳往督勦省城地方應辦事件柏貴卽可代辦該督統轄兩省責無旁貸自必通盤籌畫以副委任也將此由六百里加緊諭令徐廣縉並諭葉名琛知之○調四川雲貴兵各二千名赴廣西勦賊○免蹕路經過地方明年額賦十分之



三〇丁亥諭內閣昨降旨將烏蘭泰照都統例賜卹因思逆匪初撲省城烏蘭泰督兵直至城下已據將軍橋要隘乃因礮傷入骨甫及兩旬遽致殞命深堪憫惻烏蘭泰著加恩照陣亡例議卹以慰忠魂尋予祭葬世職如都統例諡武壯賞銀一千兩治喪〇已丑諭軍機大臣等常大溱奏鄞縣梟徒被拏抗拒致傷兵勇並帶兵將領委員被圍各情形一摺前據該撫奏奉化鄞縣兩屬鄉民藉豁抵欠圖減糧價聚眾滋事並姚家浦梟徒乘機竊發業經降旨飭令分案查拏茲據奏稱該二縣紳耆紛紛呈稱以鄞縣之東南鄉與奉化之埠頭莊各匪滋事伊等或因徧脅入城或因地界附近以致牽連情願督飭鄉民跟尋緝送或帶領兵役拏犯懇請暫免進兵可見小民具有天良尙知畏法況國家正賦之供自有定科則幸邀恩旨豁免已屬格外之仁其不在豁免之例者如

該地方官曉示明白該鄉民何至據以藉口該撫既經飭令臬運兩司前往查辦卽著迅將爲首之人嚴拏懲究並徧諭各鄉紳民妥爲約束毋得附和滋生事端以致玉石俱焚並當嚴查該二縣知縣馮翊舒達如有故違定卽濫索浮收等情卽行嚴參懲辦其鄞縣東鄉鹽梟膽敢鳴鑼糾眾抗拒官兵副將張蕙等竟被迎拒圍困兵勇俱有受傷實屬督不畏法該撫見在添調官兵馳往拏辦卽飭孫毓淮慶廉等相機妥速籌辦務將起意爲首各犯設法擒獲其被脅入夥者宣諭解散毋令釀成大患並著查明該副將張蕙等下落至地方文武有無辦理不善激成事端或鹽商藉端激變之處亦著該撫詳查明確據實奏辦不得稍涉含混將此由四百里諭令知之○戶部會吏部議奏上下忙錢糧各省藩司議敘議處章程擬請上忙完至三分下忙完至五分者免議其在三

分五分以上者分別議敘其不及三分五分者分別議處從之○  
賞看守各行宮弁兵半月錢糧○庚寅 上謁 泰陵 泰東陵

昌陵詣 昌陵 隆恩殿 孝和睿皇后梓宮前行禮恭謁

慕陵○賞守護 昌陵值班官員兵丁銀幣○辛卯 上謁 慕

陵行釋服禮回鑾○諭內閣程喬奏匪徒聚眾謀逆見已擒獲

多名地方漸就肅清一摺前因湖南郴州地方突有賊匪多人夤

夜入城劫獄戕官經該處文武及派委各員先後獲犯三十餘名

餘匪逃散當經降旨著該督等卽飭嚴拏盡法懲治茲據該督馳

奏該匪等自州城竄至永興所屬之長茅沖馬頭嶺油榨墟一帶

糾集地痞豎旗謀逆復經該督督飭派出之鎮將文武各員星馳

勒捕旋據永興縣會同紳士分帶兵壯生擒首匪劉代偉等七十

餘犯參將積拉明阿等會督紳士兵勇擊斃數十名生擒一百六

十餘人桂陽嘉禾耒陽興甯等州縣協獲二十餘名地方漸就肅清居民均已安堵該匪等結盟拜會稔惡已深輒敢因地方官查辦嚴緊恃眾戕官糾黨謀逆若非迅加撲滅難免勾結蔓延程喬采辦理此案尙爲妥速除首匪劉代偉已受傷身死外所有見獲各犯嚴審懲辦仍飭確查首要各犯暨在逃餘匪全數弋獲以淨根株○諭軍機大臣等鄒鳴鶴奏省城尙未解圍連日擊賊獲勝情形一摺並將省會城廂形勢繪圖呈覽此次所報勝仗除焚毀賊匪攻具外未有出奇制勝之處是該匪仍未大受懲創所稱省城西清門窆出舊礮多位及探聞賊營自言攻城時屢見神威助順等情亦多係敷衍空談又據奏稱余萬清帶到楚兵一千名是該提督已抵桂林前據程喬采奏賽尙阿咨調余萬清馳赴九塘地方本日程喬采奏又稱該提督接向榮來咨令其駐守靈川靈

川在桂林城北而九塘則在省南既稱與賽尙阿聲息相通何以彼此咨調互相歧異再鄒鳴鶴疊次摺報均由六百里加緊馳遞前次因奏報省城被圍期於迅速若見在所奏守禦情形與上次大同小異何必仍用加緊字樣至駭沿途聽聞至另片所奏各情朕已詳悉批示據稱省城內外兵勇二萬餘人賊匪男婦約共五六千人平樂昭平荔浦等處已無會匪滋擾全股俱在其內是該匪除婦女外真賊不過數千人若不乘此設法殲擒坐待賊匪從容布置又成負隅之勢卽向榮所論兵丁壯勇情形雖不爲無見然生力軍豈能一時驟到見在楚兵陸續赴援勞崇光亦卽日到內外夾攻時不可失著賽尙阿與鄒鳴鶴向榮等同心籌畫毋致貽誤事機自干重戾懍之將此由六百里諭令知之○賞沿途當差兵丁半月錢糧○予湖南死事通判胡禮箴祭葬世職○癸

已賽尙阿奏賊於城西之甘橋圈門腳五里墟一帶將民房占踞南門文昌門外亦有賊眾分踞文昌門外張氏宗祠及臨江象鼻山上兩處均有賊礮臺又象鼻山下泊船數十隻婦女輜重悉載其中圈門腳後有古牛山賊於其上登高瞭望可以窺見城中賊目分住西南門外二十日向榮令謝繼超帶領提勇擊賊於獅子巖二十一至二十六等日李孟羣督帶良勇與萬明魁張敬修等勇均由飛鸞橋進攻嗣後皆因雨阻未能出隊見在各路兵勇全住省城如賊再竄亦必須由省城豫派兵勇追襲各處地方緊要均不可再有疏失一俟勞崇光帶領張國樑等勇到來卽飭由省城南路相機前進仍飭向榮督飭城內外諸軍於此項壯勇到後務卽約期併力痛剿上諭軍機大臣等據賽尙阿奏省城連日戰守情形一摺該大臣駐紮陽朔兵力尙單省南諸賊不能不防

其回竄必須南北合力攻擊方可破賊解圍前已諭令四川雲貴等省選調精兵四千名本日復諭令季芝昌揀選汀州漳州泉州各屬精兵三千名聽候調遣惟坐待各省徵調赴援尙需時日省垣被圍而月萬無株守孤城毫無展布之理南路空虛尤須精悍兵勇接濟勞崇光旣經兼程前來該大臣卽可與之籌酌出奇制勝之策令其在南路協同攻剿杜賊回竄並遏艇匪北駛與賊句結其省城內外兵勇不下二萬餘人卽著專責向榮劉長清等妥籌布置與勞崇光南北夾擊凡西門外之大夥南門外分占之處與象鼻山上下所築礮臺及賊黨婦女輜重船隻必須隨時相機攻擊固不可冒昧輕進尤不可坐誤事機若鄒鳴鶴專恃向榮爲長城向榮又借堅城爲坐鎮賊來旣不能擊之使去賊去又恐其復來困守待援豈桂林一城之外皆不顧耶徐廣縉未到粵西以

前該大臣總統大兵精力如可支持務當通籌全局責成向榮勞崇光等分飭文武員弁併力合勦省城固屬緊要他處亦不得再有疏虞何處員弁兵勇不能得力卽惟該處統兵大員是問俟徐廣緝到後如賽尙阿病體難支卽遵前旨據實具奏毋稍延誤將此由六百里諭令知之○諭昨有旨飭令徐廣緝馳赴廣西會同賽尙阿督辦軍務諒該督接奉此旨必已星馳就道惟前飭揀帶精兵曾據奏稱廣東防勦處處喫緊兵力難分自係實在情形本日已由六百里寄諭季芝昌令揀派漳汀泉三屬兵勇三千名以備該督調遣閩粵壤地相連由潮州取道馳赴廣西較之雲貴四川可期早到或將閩兵畱於廣東防堵而以廣東得力獲勝之兵調赴廣西卽由該督斟酌辦理至桂林省城見尙被圍據鄒鳴鶴奏賊匪全股連婦女在內約止五六千人未知是否確實省城兵



勇二萬不爲不多斷無株守坐困之理已飭賽尙阿督同勞崇光等由南路向榮率各處援兵由北路相機夾擊該督如已馳赴廣西卽會同妥籌辦理軍中事權貴一儻賽尙阿病體難支自必遵旨將欽差大臣關防移交該督所有軍務卽統歸該督節制辦理一切軍需款目亦可覈實稽查見當經費支絀之際部款籌撥甚艱且恐緩不濟急昨據該督等遵旨覆奏妥辦捐輸情形如果踴躍著有成效著與葉名琛酌商於廣東各款內移緩就急通融撥解廣西約有百萬之數陸續分起源源接濟一俟捐輸有成項次第劃歸原款諒該督撫定能兼權熟計無誤轉輸也將此由六百里諭知徐廣縉並諭葉名琛知之○賽尙阿奏桂林戰守情形得旨覽奏具見卿費盡苦心矣鄒鳴鶴究有何不妥之處已有旨令卿會查向榮尤應激勵莫使故態復作該提督見未回任又有守

城之功遠以參贊自居矣○調福建兵三千名赴廣西剿賊○甲午 上還宮遷居弘德殿○諭內閣 先聖孔子德配天地道冠古今我朝 列祖 列宗暨我 皇考宣宗成皇帝 親詣釋奠並臨雍講學多士圍橋觀聽洵盛典也朕寅承丕緒志切景行謹於明年仲春上丁親詣 文廟並臨辟雍講學用昭重道尊 師稽古右文至意其應行典禮事宜著各該衙門先期敬謹豫備○諭恭親王奕訢於本月二十二日分府著在內廷行走仍在上書房讀書○諭常大澂奏梟徒被拏抗拒戕害將弁委員見在督拏一摺浙江鄞縣梟徒聚眾滋擾副將張蕙等帶兵往拏均被圍困該督續調兵勇馳救詎該副將等先已被戕經署甯波府知府畢承昭等與提督善祿所派員弁併力攻擊殲斃百餘人餘匪逃散我兵及鄉勇亦有傷亡該梟徒等聚眾戕官形同叛逆實屬罪不

容誅該撫見已添設官兵親往督辦著卽嚴飭文武員弁迅速兜拏盡法懲治毋任漏網至該處因糧滋鬧與梟徒本不相涉既據紳耆等畏法呈求卽將首犯按法懲辦其餘良民仍當剴切曉諭毋致玉石俱焚臬司孫毓淮署鹽運使事溫處道慶廉帶兵往捕調度失宜常大澹未能先事妥籌均屬咎無可辭著交部分別議處○諭軍機大臣等常大澹奏梟徒抗拒戕害將弁委員兵勇多名見在督飭拏辦並密陳籌辦情形各摺片覽奏殊深憤懣糧鹽匪徒滋事兩案同時並發全在地方官察看情形分別先後緩急妥爲辦理卽需兵力彈壓亦應先行曉諭解散匪黨繼以兵威方不至有挫失該撫派委大員前往何以輕率如此辦理太不成事此案鄞縣東鄉梟徒在石山街拒捕戕官卽係上年冬間奪犯滋事之徒與本年東南西南兩鄉圍減糧價滋鬧之案本不相涉見

據該臬司等探稟梟徒自知罪在不宥藉糧案爲由散布傳單希圖哄動各鄉勾結一氣爲恃眾抗拒之計此事尤關緊要該撫卽飭臬司孫毓澁署運司慶廉督同該府縣等傳集地方紳耆曉以利害先將糧案趕緊查辦完結止須將首犯周祥干等拏獲懲辦無令拖累無辜俟該處糧案完結後該撫卽督帶前調弁兵親赴該處專辦滋事梟徒務須全數殲擒盡法懲治毋任一名漏網以伸國法而安良善將此由四百里諭令知之○子浙江死事副將張蕙知縣德成等祭葬世職○乙未諭內閣本年三月 皇考宣宗成皇帝升祔禮成朕釋服後於本月十六日恭詣 太廟行禘祭禮 奉先殿亦應敬舉特祭之典恭查從前 皇祖仁宗睿皇帝升祔後 皇考復親詣 奉先殿致祭行禮朕敬法 前謨用伸誠悃謹於五月十一日恭詣 奉先殿前殿讀祝致祭所有應

行禮節著各該衙門照例敬謹豫備○諭朕於本月二十二日駐蹕圓明園內閣六部九卿衙門遇御門理事及本衙門帶領引見該班奏事日期均著遵照舊例輪留堂官一人在署辦事不必全行赴園○丙申 上詣 太廟行祫祭禮○巳刻 皇貴太妃幸重華宮 上跪迎於崇敬殿外奉 皇貴太妃御延春閣侍膳畢詣撫辰殿外跪送 皇貴太妃還宮 上自弘德殿移居養心殿○賽尙阿奏接據撫臣鄒鳴鶴及向榮函稟三月二十七日四鼓賊用四輪檔車多架乘夜直撲城下勢極兇猛守城及巡城官兵奮力拋擲火藥火罐將其檔車焚燒斃賊無數紛紛敗退同時又有賊匪用槍礮攻撲東西兩門黎明時復撲西南及文昌門皆爲兵勇擊退二十八日賊千餘人過東門對河由花園里繞李家嶺分股來撲總兵秦定三常祿侍衛開隆阿等新營並於五通廟後

地方伏賊數百秦定三開隆阿等帶領兵勇從貓兒山兩路分出見賊在花園里一帶搖旗擁來兵勇向前攻打並由兩邊圍鈔賊不能敵當卽敗走兵勇飛追殺賊數十名追至花橋賊紛紛撲河淹斃不少秦定三開隆阿恐賊隔河埋伏紮住兵勇將隊撤於貓兒山後俟賊復來衝出濟攻少頃賊果由花園里楊家碑菜園三股分來每股數百當令楚勇潮勇迎敵菜園之賊博白勇迎敵花園里之賊各營迎敵楊家碑之賊賊又敗奔兵勇復追至花橋河千斃賊多名開隆阿等令兵勇將附近賊巢燒燬提督余萬清派兵過河接應均各回營二十九日賊數千從棲霞寺一帶前來兵勇仍由貓兒山分路而出賊眾由福隆墟橋衝至秦定三開隆阿等令兵勇於各土埠豫伏擡礮先令博白勇誘敵有手執大黃旗一賊拌命直前羣賊布開衝出開隆阿督兵勇奮力向前攻打兩

遯伏礮齊發眾賊慌張敗走執旗一賊猶挺立不動兩旁圍繞數十餘賊秦定三開隆阿等令兵勇向前拋擲火彈眾賊擁護奔回開隆阿等親督兵勇追殺前浙江知縣江忠源等各帶官兵及博白勇分路尾追三面圍殺賊眾紛紛倒地生擒及撲水過河淹斃者計百餘人隨將楊家碑菜園一帶賊巢燒燬銀沆萬明魁等帶領福勇荔安勇由陸路張釗等駕小船分隊由水路進攻下關之賊並約秦定三等出兵接應賊船十餘正泊鬪雞山西岸張釗等船俱到卽時開礮打破賊船賊眾敗走遙見騎馬二賊飛馳在文昌門外雷祖廟一帶調出黃旗數十至鬪雞山下鈔來張釗等將艇順流放下鬪雞潭東岸對河用礮轟打斃賊多名相持約有兩時忽見賊後岸上火起料係銀沆等勇接應賊眾蒼黃遁走初一日城內外礮聲不斷是夜賊已分股一由東路鬪雞山駕艇過河

焚燒歐家村走江東背後扯縵路而去一由西路廟頭墟黃塘而去城外諸軍甫將大集方期四路併力就此一鼓蕩平詎逆賊知我後路勁兵齊至乘夜分投他竄查廟頭墟路通義甯該縣城小無兵且距省城僅五十餘里賊蹤飄忽俄頃卽至前界龍勝可出湖南武岡等境江東扯縵路北走興安東走平樂富賀亦通湖南廣東亦可南走陽朔在在均須扼截秦定二開隆阿等一軍已自省城對河跟追江東賊股當卽飛札令其就近馳追除畱兵防守省城外速撥兵勇拔營分投追剿已革總兵李能臣帶領博白壯勇千名馳赴義甯並飭朱啟仁所帶東勇會同由六塘探明追剿張國樑帶勇千名初二日晚間趕到飭令卽赴省東南路之沙子街堵剿查該處爲平樂恭城灌陽興安四達之衝該壯勇等到彼最爲扼要其餘壯勇到齊亦令陸續前往張釗礮船調回順流駛



下平樂並飛咨湖南廣東各於交界嚴防竄越平樂義甯兩處尤  
 為切近所冀省城兵勇亦如前在永安州時立即派撥跟追則兩  
 處城守或可無虞疏失賊竄地方皆通湖南之路程喬采自帶重  
 兵防堵楚境賊果竄越定可迎頭截住較之竄由粵省各府州縣  
 未有重兵防堵者轉可放心且該逆如果勢分我軍又添湖南調  
 來新兵及南邕等壯勇合計五六千人從後分投追截如能與楚  
 省防兵前後夾擊似較賊聚一處時我軍四圍密布動覺兵單者  
 或轉易於蕝事臣惟有嚴催各路追剿之兵不許片刻稍遲使賊  
 所到不得喘息俟其奔突一有定向再飭諸軍分投繼往前截後  
 擊庶可乘機力圖殄滅又奏接到向榮稟函賊於初一夜二更後  
 先於象鼻山點放火箭亂射入城又於文昌門西門轟打槍礮無  
 數四更時五里墟圍門腳忽起火光向榮與撫臣上城查看知賊

已走當卽商派新到湖南廣西四川雲南各兵勇並提勇博勇等  
共七千名統歸劉長清余萬清督帶追剿該逆於初二日丑刻由  
鬪雞潭坪之衛家渡過河約有五六千眾盡向伶仃坪而去又有  
訛傳賊由西二塘竄赴義甯柳州去者向榮本欲自追撫臣及省  
城紳民挽留仍守省城當與撫臣會咨各提鎮趕緊帶兵卽出省  
城東北一路追剿並探明該逆是否欲竄湖南卽行飛稟等語查  
與臣所得探報稍有不同其過河東竄一路則已符合至義甯一  
路雖據函稱係屬訛傳臣探報言廟頭墟路分竄之賊較少而該  
縣距省最近且通柳州湖南尤恐逆賊聲東擊西似亦宜加防範  
上諭內閣賽尙阿奏逆匪被剿分竄見在省城解圍一摺據稱  
逆匪水陸被剿於本月初一日夜分路逃竄見在向榮駐守省城  
余萬清勞崇光均各趕到著賽尙阿卽飛催各路文武督率兵勇

分途追剿並著程喬采徐廣縉等飭令文武於交界處所嚴防竄越毋令逆倭復張見在徐廣縉計已馳赴廣西正可合力攻剿一鼓蕩平也○諭軍機大臣等賽尙阿奏逆匪分竄省城解圍見飭各路兵勇分投追剿並查探賊蹤各摺片本日已由六百里諭令程喬采徐廣縉等嚴密防範迎頭截擊矣逆匪圍攻桂林省城已逾一月屢次爲我兵擊敗於四月初一日夜間分投他竄據該大臣探報一由東路關雞山過河一由西路廟頭墟分小路而去與向榮所稟情形雖稍有不同而其過河東竄一路已偵探明確在粵西則平樂縣一帶最爲喫重而湖南廣東交界處所尤爲緊要其義甯一路亦與楚壤相接賊勢分竄無定該大臣已分飭各路文武兵勇分投截擊務探賊竄之路與鄰省合力截剿惟賊情詭譎異常往往於退走後設伏以誘我師該大臣務當密飭統兵大

員於跟蹤追剿時詳加偵察處處接應萬不可再墮詭計亦不可藉詞耽延觀望見在我軍統計兵勇七千名均歸劉長清余萬清督帶追剿兵力不爲不厚且湖南廣東各督撫均必併力兜截正可乘賊勢分散喘息未定前後夾擊一鼓蕩平桂林省城解圍固須防賊回竄紳民挽留向榮守城亦係人情之常惟鄒鳴鶴坐鎮省垣督同畱守防兵及紳民等嚴密巡護亦可有備無患向榮勇敢素著自應於城外扼要地方督兵爲各路聲援使賊不敢回竄且可相機進剿著賽尙阿隨時調度勿誤事機將此由六百里諭令知之○諭據賽尙阿奏逆匪分竄省城解圍一摺賊匪圍攻廣西省城幸城內守禦嚴固城外援兵漸至賊勢屢挫於四月初一日夜間分投竄逸賽尙阿已嚴飭各路兵勇跟蹤追擊扼要堵截並飛咨廣東湖南等省嚴防竄越該匪詭譎異常見已分逸勢必

肆行竄擾廣西東北東南一帶與廣東湖南緊相毗連在在可慮  
必當協力防堵著程喬采駱秉章徐廣縉葉名琛督飭文武員弁  
認真巡防嚴密堵禦勿任賊匪闖入並隨時偵探賊蹤或於要隘  
處所迎頭截擊或越境協剿相機進攻總期速靖賊氛勿致蔓延  
貽患將此由六百里各諭令知之○丁酉諭內閣顏以燠奏豫東  
黃運湖河見在受患情形一摺上年江南豐北漫口黃流旁溢以  
致山東境內被淹節經降旨飭令該撫賑卹災民並飭該河督將  
運道分別鑿挑回空漕船改由湖坡行走先後歸次見在豐北漫  
口未經堵合顏以燠所陳河湖受患挽運維艱原係實在情形惟  
補救因時全在該河督設法辦理見值糧船銜尾北上務當督飭  
道廳營汛隨委各員協力催趲毋得藉口人力難施稍形諉卸遇  
黃水盛漲之時應如何宣洩歸海以免上游喫重著與陸建瀛楊

以增隨時會商妥辦至該省被水災黎今尙未能復業朕心實深  
憫惻著劉源灝派委司道大員周歷巡查妥籌賑撫毋令一夫失  
所地方匪徒仍著密訪嚴拏從重懲辦以免藉災滋事○戊戌諭  
內閣廣西自軍興以來在事文武各員志切同仇竭忠矢報其有  
臨難捐軀舍生取義者朕於奏報到日無不立沛恩施優加卹典  
因念陣亡各總兵之子孫尙未盡邀賞賚著該旗及各省督撫查  
明廣西陣亡各總兵子孫有無官職年歲若干分別開單先行具  
奏候孝滿服闋時由該部旗帶領引見候朕施恩至於守土各員  
隨征將弁以及兵丁鄉勇殺賊殞命業已隨時交部議卹其父母  
妻子茆獨無依者尤堪矜憫著該旗都統及各省督撫等轉飭該  
營各員逐一查明加意撫恤毋令失所用副朕推恩忠節有加無  
已之至意將此通諭知之○諭陣亡都統銜廣州副都統烏蘭泰

著加恩賞給輕車都尉世職其應繼子嗣著於百日孝滿後該旗  
卽行帶領引見○諭太僕寺少卿徐繼畚奏陳釋服之後三漸宜  
防一曰土木之漸一曰宴安之漸一曰壅蔽之漸援古證今深切  
事理於朕修身制行聽言用人之道裨益良多見將移蹕園居僅  
飭所司照例繕葺並未特興工作每念 詒謀儉德昭示後人夙  
夜兢兢無敢逸豫至宴安之漸每起於隱微王化之原必基於宮  
壺朕嘗遵 家法平日讀書明理闇修慎獨自勵操存茲觀該少  
卿所奏杜漸防微意深詞婉實與朕心契合其末條所論言路旣  
通而壅蔽轉生於不覺尤爲切中時弊朕思聽言不可不廣擇言  
不可不精惟以理爲權衡總以見諸行事爲符驗則是非可否灼  
然不淆乃有合於敷奏明試之義嗣後有言責諸臣惟當竭誠匡  
弼朕亦虛懷受納上以實求下以實應庶幾宏濟艱難俾治理蒸

蒸日上也徐繼畬此奏朕當置之座右用資省覽昨據副都御史李菡陳奏因循積習等弊四條所論亦不爲無見著並存之以備採擇○以湖南布政使恆福爲太常寺卿○已亥諭內閣雲貴人武佳氏著晉封爲雲嬪所有應行事宜著各該衙門察例具奏○諭軍機大臣等前據戶部奏請復綠營兵制舊額以節糜費並侍郎曾國藩條陳裁兵事宜本日復據戶部尙書孫瑞珍奏豫籌庫餉請照前議施行等語乾隆四十六年添給武職養廉一案增兵六萬六千餘名嘉慶道光年間節次裁改尙餘四萬八千餘名此項增兵添數原因舊設空名錢糧挑補足額而自增兵以後空糧之弊仍復不免朕訪聞各省皆然是國家未收增兵之益而徒受增餉之害無論見在帑項未充亟應裁節卽以整飭營伍而論亦必嚴汰虛伍而後養一兵可收一兵之用著通諭各直省督撫會



同各該提鎮查明某營某汛原額兵若干續增若干先行據實具  
奏一面確查所屬空名錢糧寬其既往失察之罪卽由該督撫總  
覈裁汰如裁汰後尙浮於乾隆年間舊額以後遇有缺出毋庸挑  
補並隨時斥退老弱殘廢約計三年必可裁復舊額仍將所裁兵  
數與節省餉銀每屆年終彙奏一次以備稽覈嗣後武職官員如  
再有隱匿空糧等弊卽著該管大吏嚴參重處以儆貪婪而肅戎  
政至各該地方今昔情形各有不同不妨於裁汰之中寓變通之  
法卽有裒多益寡之處統全省綠營而計總不至有逾舊額各該  
督撫受恩深重諒能各矢公忠妥爲辦理也將此通行諭令知之  
原奏並戶部曾國藩各摺件均著鈔給閱看○以潘鐸爲湖南布  
政使英桂爲山西按察使由山東登萊青道遷○庚子程喬采奏探得粵逆  
竄至海陽坪初五日攻撲興安縣初六日撲全州賊船五十餘隻

分爲水陸兩路欲直撲永州又探得該匪一竄義甯一竄永福此  
股首逆羅亞旺約五千餘人查永州水陸均緊與全州接壤水路  
尤爲迅捷江永防兵分布要隘兵力本不甚厚又經兩次抽撥赴  
粵應援見調湖北之兵因道遠刻難趕至賊氛猝近實覺單薄堪  
虞查零陵縣屬黃沙河係由全至永水路要道臣本派有防兵四  
百名今恐不敷又於附近酌撥二百名共資堵截並飛飭該帶兵  
官先將灣泊各船全行撤歸楚岸一面在兩岸設備槍礮一遇賊  
船卽行奮力轟擊提臣鮑起豹駐紮江華飛咨移紮永郡相機策  
應正在布置間適接署廣西提臣劉長清來函已與總兵王錦繡  
等行抵興安之巖關口擬卽徑詣全州因全州爲楚南門戶如得  
固守則永州可保無虞臣又飛咨迅速馳往兜剿並咨商賽尙阿  
仍飭余萬清迅赴全州一同守禦卽使該逆竄楚而劉長清等旣

跟蹤追捕楚省又迎頭堵截似可腹背夾攻臣當殫竭心力防剿兼施斷不敢稍事疏懈 上諭軍機大臣等湖南永州水陸兩路均與全州接壤水路尤爲迅捷此時湖南防堵緊要之至該督見已添調官兵並飛咨鮑起豹移兵永州著卽督飭文武分路嚴防水路船隻業經全撤並於兩岸設備如遇賊船竄入務須併力堵截儻此處稍有疏虞賊得揚帆順流而下勢更蔓延劉長清王錦繡等馳赴全州恐未能繞出賊前余萬清本係畱楚防堵之員如能馳赴全州禦賊尙可保固楚南門戶儻賊竄楚境卽與劉長清等分股夾擊毋稍延誤該督前調湖北之兵著卽飛催趕到前已諭令四川總督徐澤醇選備精兵二千名聽候廣西調遣此時湖南防剿緊要著該督酌量情形如須調用卽著飛咨四川催令迅速赴楚以備攻剿至衡州一帶會匪仍應督飭地方官加意豫防

母令暗相勾結地方紳民尤須勸令實力團練互相保衛不惟禦外來之賊兼可防本境之匪總在該督撫等相機籌辦俾眾志成城庶幾有備無患各省解粵軍火餉銀此時桂林一路梗塞自應暫行截留一俟探明路徑卽知會廣西接護解往毋稍大意將此由六百里諭令知之○諭欽差大臣大學士賽尙阿湖南永州水陸兩途均與全州接壤水路尤爲迅速湖南官兵屢次調撥赴粵兵力較單見調湖北各兵亦難剋期趕到此時湖南防勦緊要所有前備四川兵二千名已諭令程喬采酌量催調赴楚矣此股匪徒盡在全州一路其由西路廟頭墟分竄之賊究係若干賊首羅亞旺外其餘洪秀泉等各賊首又復馳往何處該匪旣由江東扯綫路北走興安其平樂富賀一帶是否仍形喫重余萬清統帶重兵由桂林進追見在行抵何處著賽尙阿飛飭各員迅速應援合

力夾擊毋稍延誤再賊眾大股全奔楚境桂林業已解圍且有巡撫坐鎮省垣值此追剿喫緊之時向榮仍守省城置之空間之地豈不坐失事機著該大臣體察情形何處最爲緊要卽飭向榮帶兵前往相機剿辦並可堵賊回竄之路該大臣此時是否仍駐紮陽朔抑已移營扼要處所軍情緩急應變制宜想必自有斟酌也至由永州至桂林一路見在梗塞所有文報軍餉改由何路一併查明具奏並隨時飛咨湖南勿稍大意將此由六百里諭令知之○辛丑特登額以病免以桂良爲兵部尙書由福州將軍遷○以前任閩浙總督怡良爲福州將軍○壬寅 上幸圓明園奉 皇貴太妃居綺春園○癸卯 上詣桃花春一溪問 皇貴太妃安自是以爲常○鄒鳴鶴奏向榮日夜與臣共守危城已踰而月三月二十七日夜賊用呂公車攻城幸臣先期設備向榮憑城指揮自丑至

卯在槍礮叢中竭力抵禦益形勞瘁次晨卽脇痛寒熱交作迄今  
氣喘不止年踰六旬精神疲乏勢難力疾乘騎星馳就道並據城  
內紳民環籲以向榮兼程赴救民獲再生見在賊匪雖竄深恐奸  
謀百出詐去復來必得向榮畱城坐鎮民心庶可安定情詞甚屬  
迫切自應俯順輿情藩司勞崇光業於三十日行抵陽朔張國樑  
亦卽日到臣已馳函賽尙阿籌商以該藩司所帶壯勇多係生  
力或竟令統領追剿各軍調撥進攻必可得力目前省城解圍搜  
查附近各村並無藏畱餘孽所有四門四郊應行趕辦之事如修  
理被擊城堞搜尋賊遺礮械激勵四鄉練眾分別裹脅罪犯均趕  
緊舉辦 上諭軍機大臣等廣西省城既已解圍賽尙阿已由陽  
朔回省與該撫會商防守自可無虞疏失惟逆匪全數奔竄楚粵  
交界情形極爲緊要且湖南兵力單薄全賴粵軍大隊追擊合力

兜勦見在劉長清等帶兵前往余萬清亦折回楚境仍恐賊股猖獗我兵不敷策應向榮見因脇痛暫緩出省該提督受恩深重具有天良想不肯藉詞株守省城坐失事機也前此廣西省城被圍湖南鎮將趕卽帶兵赴援此時自以援勦楚界之賊爲要著饗尙阿體察情形隨時調度撥兵分路追勦毋任逆匪竄越鄰境○命協辦大學士杜受田福州將軍怡良馳赴山東江南查辦事件○乙巳賜章璽等二百三十九人進士及第出身有差○丙午諭內閣賽尙阿奏南甞官兵生擒首匪蘇凝三及其夥黨殲擒殆盡等語顏品瑤股匪及其弟顏三殲斃後惟首匪蘇凝三在逃經勞崇光密商總兵惠慶並飭通判李天鈺等設法購綫廣東高廉道沈棣輝亦派兵勇前往會同馳赴那谷賊巢合力攻擊斃匪七十餘名將蘇凝三並其兄蘇凝二一併擒獲兼獲夥匪多名起獲器械

多件此股匪徒殲除殆盡南邕一帶地方漸就肅清所有在事出力之文武員弁兵壯等著查明保奏其投誠之潘其泰疊次接濟官兵殲擒首匪著以把總拔補並賞戴藍翎以示鼓勵○諭大學士軍機大臣會同刑部具奏審明甘肅番案各員分別定擬一摺已革陝甘總督琦善辦理雍沙番族並無搶劫確據輒行調兵剿洗實屬謬妄且並未先期奏明尤屬專擅著發往吉林效力贖罪其審辦此案並未研究確情率行定擬斬梟重罪之已革甘肅布政使張集馨已革西甯道文桂已革署蘭州府 府步際桐承審此案始終其事之已革知州趙桂芳已革知縣尹泗均著發往軍臺效力贖罪已革遊擊冷震東非刑逼供任性妄爲著發往新疆效力贖罪已革知府桂昌已革知縣姜熊劉元績候評李志學據供承審僅止數日並未隨同定案著暫行交旗交坊仍由陝甘總



督查明該革員等曾否取供定案是否先期出省咨部審別覈辦  
參將珠克登都司石長興西甯府知府鈴祥訊問番案會取有認  
搶草供並未定讞上詳著一併交部議處番子羣吉等十四名既  
訊無搶劫確據著免其治罪仍交陝甘總督分撥不近番界之州  
縣嚴加管束儻有不安本分逞忿滋事等情卽著從重懲辦前署  
陝甘總督薩迎阿於特派覆訊之案並未錄取各員供詞遽行擬  
罪實屬草率伊子戶部員外郎書紳並無審案之責輒與司員等  
同坐問供實屬不知檢束薩迎阿書紳均著交部分別議處其隨  
同審案漏未取供之刑部郎中梁熙員外郎覺羅奎棟武汝清亦  
屬不合均著交部議處嗣後甘肅邊界地方遇有野番搶劫並熟  
番及內地奸民勾引擾害之案該督仍嚴飭該管文武隨時隨地  
實力查拏盡法懲治不得因琦善以錯謬獲罪遂於應辦之案相

率因循致蹈廢弛惡習自干咎戾○賽尙阿奏賊竄關雞潭等處  
過河復由靈川縣屬靈田圩奔興安縣屬海陽坪爲興安靈川灌  
陽臨桂恭城等屬交通之處而興安尤爲切近先期派令張國樑  
壯勇由沙子街取道灌陽趨興安迎頭堵截並飭李能臣將所帶  
博白壯勇由臨桂取道興靈追剿余萬清帶新到楚兵千名江忠  
源帶楚勇千二百名劉長清率奚應龍帶廣西兵七百名提標三  
項壯勇千名王錦繡帶雲南兵九百餘名秦定三常祿帶貴州兵  
五百名及博白勇千五百名虎嵩林帶川兵六百餘名分投迎截  
追剿賊於初四日竄至興安入城焚掠卽出城屯紮劉長清等兵  
追至興安之巖關口擇要紮營正與秦定三王錦繡商同進剿適  
余萬清常祿亦同時趕到當卽會商分兵三路前擊後襲秦定三  
江忠源由西小路出爲頭敵余萬清李瑞王錦繡由中路進劉長

清常祿虎嵩林由東大道進探得賊復全夥竄往興全連界之唐家司而去初五日劉長清等兵勇追至離唐家司五里之瓦子鋪該逆分股搖旗吶喊擁擁而來劉長清余萬清督率將士奮力齊擊該匪拚死拒敵鏖戰四時之久斃賊百餘秦定三江忠源等兵勇由小路出碎井頭距唐家司五里許一面紮營一面撥兵豫防賊撲並於山衝內蛇嶺設伏該逆果卽分股來撲約千餘眾秦定三督同遊擊嚴承恩及江忠源等誘賊至伏突起猛擊該逆敗走半分水陸兩路往全州逃逸半回唐家司分夥盤踞各村莊要路抗阻初六日該逆復由唐家司竄至全州界首地方又聞賊於水路之鎮安司鳳凰嘴等處游弋旋又探報賊船已抵全州四五十號該州先有官兵架礮堵守河面賊船不能前進賊又於全州對河紮營分起往各村莊擄掠全州城內及城北門外均有兵練防

守又有湖南交界黃沙河防兵至全幫同守禦又據向榮稟據劉長清函報該逆竄攻全州勢甚猖獗我兵大隊行走稍緩恐未能迎頭攔擊當與余萬清商同將未到之楚兵四百名截留全州城內並札調楚粵交界之黃沙河練勇亦至州城初七日探得賊匪後隊已過覺山其前隊圍攻州城劉長清等暫於覺山紮營賊之後隊午刻亦至州城見在分踞城外東南兩門船上及西門外盤石腳飛鸞橋北門外等處安設大礮晝夜轟擊幸所截留楚兵先期馳抵州城與城內營兵團練合力晝夜防守逆匪未能攻入城外附近民房均已拆毀查全州西門必由飛鸞橋進盤石腳其盤石腳山臨河小路僅容一人行走賊已於此處安設大礮而北門前有兩河每處僅有渡船一隻往來搶竊大兵更難遙渡見擬自覺山拔營仍由西門一路至魯班橋地方紮營先將飛鸞橋盤石

脚套回再行相機進紮臣前聞賊至興安已皆全夥北向南路陽

朔一帶去賊漸遠卽於初七日由陽朔拔營晉省初八日行抵省

城接見地方官紳及帶兵文武僉稱向榮身發寒熱城中紳士呈

懇請在省垣已由撫臣附奏關隆阿亦因在軍營日久身受潮溼

右臂麻木屬令暫留營養息俟痊愈時再爲差遣查全州地方形

勢爲粵西門戶與湖南連界設再被逆賊衝過竄越楚境楚省防

禦稍疏更難收拾臣到省後卽將陽朔帶來湖北雲南等兵千餘

名派總兵經文岱副將巴圖管帶立卽拔營前進並將見在駐省

之四川貴州廣西官兵二千餘名派副將明安泰等管帶赴興全

一帶追剿合計派出各兵三千九百餘名均已嚴催卽日起程緣

省城原派追剿官兵七千餘名暨續派潮勇三千餘名實恐不敷

調辦原留守城之楚兵千五百名並東勇良勇撫臣均留在北門

外分紮此外尙有臣自陽朔帶來守營兵千餘名由向榮分布守禦惟向榮既病且爲省垣畱鎮未克前進各路追剿兵勇必須統率有人查湖南綏靖鎮總兵和春有謀有勇兵心畏服派充翼長前往統領諸軍提督余萬清本係奏畱楚省防堵之員見在賊竄全州緊接楚省防務喫緊已令仍回湖南督辦防堵其所帶楚兵卽交和春管帶勞崇光新募之宣化鬱林等勇尙未到齊張國樑帶勇由灌陽馳赴全州此項壯勇當可繞越賊前迎擊初十日勞崇光亦由陽朔晉省當卽派充翼長與和春會督諸軍速籌剿辦並飭各帶兵勇文武悉聽指揮惟該布政使總兵階資與諸將相等恐未足資統率請將勞崇光加巡撫銜和春加提督銜俾諸將咸知震服見在賊竄全州臣當卽由省城酌量移營前進並派許祥光帶領爬船由水路趨發飭勞崇光姚瑩一同前往俟臣定期

移營仍將陽朔帶來守營兵千餘名帶領前行又奏此次賊竄後撫臣鄒鳴鶴將城門緊閉仍畱勁兵坐守所派追兵僅止七千餘名賊係全夥竄由一路不敷勦辦臣入省見撫臣告以追勦必須添派得力之軍見在城守稽查自應嚴密勿懈城門亦漸可酌開其城外東勇夏勇等既難令其追賊亦可漸爲裁撤該撫謂楚兵千五百名分布西門南門文昌門三處城上最爲得力萬不可少未便調遣出外城廂內外逐日仍拏有奸細恐其大夥溷入城門斷不敢輕開城外兵勇見在僅餘東勇二千餘名夏勇香山勇二千餘名開隆阿所帶之兵勇千數百名此三營兵勇不過六七千人必得畱護省垣俟賊痛剿淨盡後再行酌裁等語臣聞賊由永安撲省城時城中慌亂已極毫無布置若使向榮帶兵遲到數時則賊先至城下城守殆不可問省城重鎮之地猶賴此勁兵驍將

馳救得全其他府縣一切守禦自更不如省城乃當賊蹤飄忽之際所有得力兵將撫臣堅議畱守省城斷難強派前往追剿卽城外所紮兵勇其數幾與派出追兵相等亦必俟賊剿盡始能酌撤僅以劉長清等兵數千當賊全夥奔突追剿豈能得力見在全州雖未撲入聞賊已將城外房屋燒燬將由水路奔赴湖南永州一經踰越楚境逆燄愈張勢必更難蕺事不料封疆大吏不能籌顧大局專以目前自衛希圖自免至向榮久歷戎行詳察其人材勇本屬可用到粵以來剿賊功績最多粵人稱頌輿論翕然惟馳驅日久備極辛勞且其用兵能勝而不能敗一經挫折時時輒思引卸臣用之一載朝夕策勵此次帶兵馳救省城猶能倍道星馳精神奮發到省一月力籌守禦城中士庶感戴益深惟每及追剿一節則自稱老病諉卸多方臣親往存視其病實未大爲委頓經臣



拊循慰問亦竟未能慷慨力疾請行實再難強之使出惟當事局  
屢更凡此多方掣肘不敢不披瀝以陳 上諭賽尙阿奏賊匪竄

逸督飭諸軍追剿一摺廣西省城解圍後賊匪竄擾興安全州經  
劉長清余萬清等分帶各路兵勇追擊見在該大臣已由陽朔進  
省著卽分飭帶兵大員迅速接應與楚省文武合力攻剿毋令肆  
擾致滋蔓延向榮患病不能出省諸軍無所統率湖南綏靖鎮總  
兵和春賞加提督銜帶兵進剿該大臣如須移營前進卽察看情  
形辦理廣西巡撫鄒鳴鶴身任封疆於賊匪攻撲省城之初城外  
象鼻山將軍橋等處險隘均無準備致爲賊踞所辦團練亦無實  
效疊次飛章入告桂林一城之外全未計及朕卽覺其倉皇失措  
一籌莫展若非賽尙阿豫調向榮赴省堵禦幾誤事機此次賊匪  
北竄又欲將猛將精兵畱以自衛株守省城實屬怯懦無能大負

委任鄒鳴鶴著卽革職以示懲儆○諭軍機大臣等本日據賽尙  
阿馳奏賊竄新安全州催飭諸軍進剿並密陳情形各一摺向榮  
身受重恩值此事機喫緊之際豈坐觀成敗之時該提督前次帶  
兵馳救省垣力籌守禦朕方念其勤勞倚以破賊乃當匪眾全數  
北竄亟須追剿輒又稱病不出其巡撫株守省城藉紳民懇留爲  
詞豈素號勇敢者固如是耶著該大臣傳知該提督一俟病痊卽  
督兵馳往剿賊朕以誠待人功罪惟所自取但看其天良何如耳  
見在興安全州被賊攻撲而全州地方形勢爲粵西門戶與湖南  
緊相接連設使逆賊豕突狼奔竄入楚境賊燄愈張懲創愈難賽  
尙阿業經分派鎮將督帶兵勇分投追剿仍當通盤籌畫謀出萬  
全趁賊倉皇未定之時與鄰境合力夾擊或可一鼓殲擒毋令越  
境滋擾是爲至要本日軍機大臣等會奏審擬逆匪洪大泉一案

已將該逆凌遲處死並據該逆供出盜營各匪姓名年貌又湖南  
廣東廣西會匪各名單著鈔給賽尙阿閱看並知照廣東湖南一  
體嚴密查拏毋令竄逸將此由六百里諭令知之○賽尙阿奏逆  
匪自省北竄業經十日見在已到全州得旨覽奏鄒鳴鶴力小任  
重怯容可掬惟向榮身受重恩不思感奮天良喪盡矣觀汝此奏  
亦覺手太軟矣此等事何用密奏○以勞崇光爲廣西巡撫由布政使  
遷○予廣西陣亡知縣黃德輔祭葬世職○軍機大臣刑部會奏  
逆犯洪大泉押解到部臣等遵旨將該犯提訊據供籍隸廣東南  
海縣幼隨胞叔洪雲秀在湖南衡陽縣讀書旋披薙爲僧閱看兵  
書潛蓄異志咸豐元年二月洪大泉往廣東閒蕩與胡以洸會遇  
胡以洸引至賊營與洪秀泉見面彼此投契結拜弟兄時洪秀泉  
夥黨有馮雲山韋政卽韋滄輝蕭潮潰楊秀青石達開秦日涓賴

漢英曾四朱錫琨曾玉秀羅大綱卽羅亞旺胡以洗等藉添弟會  
名目裹脅賊匪到處搶掠財物屢與官兵打仗俱係洪大泉主謀  
洪大泉又自與官兵打仗三次洪秀泉僭稱偽太平王封洪大泉  
偽添德王馮雲山等俱受僞封閏八月初一日逆夥韋政等攻破  
永安州城與官兵抗拒後因四路接濟不通官兵圍攻甚急起意  
竄逃本年二月十六日韋政等擁護洪秀泉帶賊五千餘人與洪  
大泉一併逃竄十八日走至鬱叢山被官兵追擊守備金玉貴將  
洪大泉擊獲洪大泉合依謀反大逆不分首從凌遲處死律凌遲  
處死梟首示眾得旨洪大泉著卽凌遲處死梟首示派刑部左侍郎  
書元署右侍郎陸應穀前往監視行刑○丁未以吳鼎昌爲廣西  
布政使倪良耀爲甘肅按察使由江蘇蘇州  
松糧道遷○己酉諭內閣上年豐  
北決口山東江南各州縣被災較廣疊經降旨動撥銀款酌籌捐

項賑撫兼施俾災黎無虞失所見在大工緩堵時日方長賑款所餘誠恐不敷支發小民待哺嗷嗷朕心時深軫念昨已令戶部籌議截留漕米備賑本日又據杜受田怡良奏請派大員督辦等語所有山東賑務著派藩司劉源灝江南賑務著派藩司邢宿藻率屬查勘專司督辦即著於江廣各幫漕糧內截留米六十萬石分撥江南三十萬石山東三十萬石以備賑濟其應如何撥運存儲散放之處即由各該藩司酌定章程妥爲經理仍隨時報明欽派大臣杜受田等覈實查辦該督撫即刊刻謄黃徧行曉諭務使僻壤窮鄉均霑實惠毋任官吏丁胥營私漁利儻有隱漏侵吞情弊即著嚴參懲辦以示朕軫念災區之至意○諭軍機大臣等見因豐工未能合龍山東下游各州縣被災較廣本日已明降諭旨著劉源灝專辦賑務李德即赴山東巡撫新任陸應穀署理河南巡

撫矣李德接奉此旨著將應辦事件速卽料理一俟陸應穀到任  
後卽行起程迅赴山東巡撫之任將此諭令知之○以陸應穀署  
河南巡撫由刑部右侍郎署○是月貸伊犁被旱回民籽種緩徵安徽無  
爲州積歉災區本年額賦暨壓徵蘆課貸湖北荊州等四衛並湖  
南岳州衛幫丁辦運銀